


*Ce fastu?*


IL  
STROLIC FURLAN  
PAL  
1980





*Ce fastu?*

IL STROLOG FURLAN





*Ce fastu?*

IL STROLIC FURLAN

Ce / 1873

IL STROLIC FULAN

An LXI

*Ce fastu?*

*Il*

# STROLIC FURLAN

pal

1980

1979

Societât Filologjiche Furlane

UDIN

*Lu à dat dongje*

*Renato Appi*

*Il disen de cuviartine al è di Giorgio Bordini.*

*Lis taulis dai « ex voto » lis à sielzudis Gigi Ciceri; 'e son  
stadis fotografadis da Riccardo Viola di Mortean.*

# 1980

de vignude di Crist

## IL 1980 AL RISPUINT:

- al 6693 dal Cîrcul Julian;
- al 2733 de fondazion di Rome;
- al 5741 dai Ebreos;
- al 1400 dai Maometans;
- al 2161 de fondazion di Aquilèe.

## FIESTIS VARIABILIS:

*La Cinise* (20 di fevrâr);  
*Pasche Majôr* (6 di avrîl);  
*La Sense* (18 di maj);  
*Pentecostis* (25 di maj);  
*Santissime Trinitât* (1 di jugn);  
*Corpus Domini* (8 di jugn);

## FIESTIS DI PRECET:

*Dutis lis domèniis*;  
*Il prin dal an*;  
*Madone d' Avost* (15 d'avost);  
*Fieste dai Sanz* (1 di novembar);  
*Madone di Dicembar* (8 di dicembar);  
*Nadâl* (25 di dicembar).

## FIESTIS NAZIONÂLS:

*Liberazion* (25 d'avrîl);  
*Fieste dal Lavôr* (1 di maj);



## 'NE VOLTE TANT ... IL "STROLIC" ...

*Amîs, da sessant'agn, come un rosari,  
— tra Sante Catarine e Sant' Andrèe —  
il « Strolic » si presente a la famèe  
par fâ i auguri e dânus il so lunari.  
Ma al è un lunari, Amîs, ch' a nol fâs storie:  
« Une: la lune » — al dîs — « Un: il soreli! »  
« Cu le Madone, i Sanz: duc', dal plui vieli  
fin a Bernache il "biât", da timp in glorie ».  
E ce dî dal « Strolic »?... Chel nol si dà vie!  
Nol cjape il canociâl par lèi li' stelis,  
né al dîs che lui al dîs li' robis bielis  
par fâ tasê le int de furlanèe.  
Chest' an il « Strolic », fûr da l' ordenari,  
nol cjale il firmament, nol sfuarze il voli:  
pluitost ch'al coli il mont!... (Ma prin ch' al coli  
sperîn nus disî dret il so contrari...).*  
*Si podarà po dî ch' a nol sa nuje,  
ch' al sei lunatic e ancje te lunate  
pensâ ch'al fâsi lungje le « bisate »  
tant par confondi un mont ch'al s'ingarbuje;*

o dî, magari in piês, là, te cjarande  
o te beorcje, in plazze o te ostarie  
ch' al s'imberdèe un tic te democrazie,  
o cisicâ che a «lui» nissun comande!...  
Il lunari ch' o sai, senze fâ storie,  
sfuei a sfuei d'ogni fat nus dà memorie  
tant che a lèilu 'o us dîs: chest an je fate!  
Fate, sigûr, Amîs: co si dîs «fate!»...  
Visaiso chê fumate?... Jere pal Pape;  
pal nestri President, pal «Sot la nape»,  
pai nestris Sorestanz, — da tant in spiete —  
pal gnûf «Ce fastu?...» e po par me e par Pepe;  
par Teo Sanson, Dal Cin e Midolini,  
par l'Udinese in «A» (ce grande imprese!);  
par cui che l' à, e par cui nol à ... ciàmese;  
pal Milan, che si sa; par Giacomini;  
par Vigi il «treseman» ch' al si domande  
cemût che si à di fâ di «buine bande»  
a jessi ancj mò vîs te baraonde  
d'Italie nestre da «le amate sponde»;  
pe liste dal «Melon» e cui le à fate  
(e dî che a plui di un pareve mate,  
mate, sigûr, Amîs, no si dis come...  
da Triest a Strasburg e da Triest a Rome!);



pal Friul libar — grant — tant che cjatâsi  
ûl dî jessi pal mont... Ma po, a ineâsi,  
magari ancje si torne, plens di fote,  
a dî che propit ca « nissun 'l è pote! »  
Pai « Salt » (cun Breznev, Carter nol s'inquiete:  
un salt o doi... a Viene — in tête a tête —  
ûl dî fox-trot o valzer... L' armonie  
— tra i doi — si romp al tre... Ma ce caie!  
Pensâ che ai nestris timps, cun ce alegrie  
si feve quatri salts in compagnie...);  
par Begin e Sadat che in Palestine  
si son cjatàs d' acordo (ce cumbîne!...);  
par Mao, par Ciang Cing e Bocassà  
pal Scià, cun Khomeini... Aya(l)tollah!  
Amîs, dite cussì, disînle sclete,  
par l' an setantenûf ch' al si complete  
al reste pôc di dî... (Memorie ingrate:  
Mennea le à pur fate ancje a « Gjambate »!  
Al è mondial! E a Monze ancje Ferrari  
le à fate in grant... E no come magari!  
L' Italie 'a cor!... Cui va, nissun lu cjape!...)  
Intant, pal pôc ch' al reste de « fugate »,  
si podarà sperâ che almanco al rivi  
— prin da l' unviâr — l' amî dal « gazoline »

*e po preâ il Signôr che al lassi vivi —  
(prin che nus meti duc' te naftaline)  
senze malans — al cjalt — da podê scrivi:  
«vive il gasolio » — in grant — cu l' aniline.*

*Il « Strolìc-gnûf », Amîs, tal meti date  
al dîs a duc' i vîs: « Je lade drete! »  
Al reste ce ch' al reste de fumate,  
ma a chest setantenûf, che si rispiète:  
tant di cjapièl 'o j fas... e di « barète! »  
Pâs e salût, Amîs, desot la plete  
e l' otante ch'al ven — drete o no drete —  
us parti in svual — a duc' — cu le comete  
ce che ué nol val plui: bez te sachete.*

\*\*\*

## 'L É CA IL STROLIGÀT

*Chest an il Stròlic (jo 'o soi so barbe) al à ulût sul lunari i pipìns dai quadrûs ex voto. 'O varès ancje jo di domandâ une grazie. Quale? Us 'e disarài in ultin.*

*'O soi lât su la lune, par viodi miôr, cul miò canocjâl, ce che al sucèdeve in Friûl par podê strolegâ l' avignî. Dopo ce che 'o ài vidût, 'o ài pensât che 'o podevi cambiâ mistîr. Us contarai, une par mês, ce che 'o ài vidût e pensât e vó mi disarês li' uèstris ideis (simpri che 'o sédis ancjemò bòins di pensâ cul uestri cjâf).*

Il Stroligàt

## PREVISIONS

*Tal '80 'o scuviarzarèn il petrolio in te lune. Il Friûl al deventarà une nazion mitteleuropee. Cando-  
lini al salvarà il teatro furlan. Il Vescul di Udin al  
tornarà a jessi Patriarcje e al varà un so parlament  
democratic. Si tignarà cont de volontât dal pòpul.  
I maz 'e tornaràn in manicomi. I drogâz no varan  
plui siringhis. I malâz 'e cjataràn puest tai ospedài e  
i vècjôs 'e varàn ospedai par lôr cont. Paròns e ope-  
ràios 'e fasaràn il lôr dovê. Lis presòns 'e saràn  
uèidis. I avocâz 'e difindaràn la justizie. I bêz 'e va-  
laràn simpri di plui e l'aur di màncul. L'inflazion si  
fermarà. Sindona al disarà la veretât. Si cognossaràn  
i mandanz dai mazzalizzis mafiôs. Tes rivistis e tal  
cine no si viodaràn plui porcariis. Si podarà zirâ di  
sere e di gnot. I siôrs no domandaràn plui la caritât  
(i pùars no le àn mai domandâde). I cantîrs di Mon-  
falcon 'e tornaràn a lavorâ. Il vin nol sarà sucarât e  
jo, Stroligât, 'o siararài buteghe 'e 'o vivarai cu la  
pensiòn!*

Il Stroligât

## CE CH' AL DÎS IL POPUL

Di bessôi, va ben. Ma dome quant che no si pô fâ insieme.

\* \* \*

Co si sta ben insieme parcé cirî atris compagnîis?

\* \* \*

Une volte (al timp dal neri), se no si veve la tessare si zompave o si lave al cunfin.

Cumò, se no si àn almanco quatri tessaris, se no si zompe, si va oltri il cunfin.

\* \* \*

Il mont al é chel ch'al é: cirî di governâlu, ma soledut di noi fâlu diventâ piês.

\* \* \*

Al timp di ué no si à plui timp. Epur il timp nissun lu mangie.

\* \* \*

Par no rivâ tarz ai apuntamenz: lâ a durmî buinore,  
levâsi adore e jessi precis.

\* \* \*

Di îr e di ué la nestre competenze. Di ué e di doman la  
nestre penitenze.

\* \* \*

Intant che a Udin e Pordenon si lavore a Triest e Rome  
si mangie.

\* \* \*

Da timp un mont ch' al sa di « marilenghe » al si smamîs.  
Si ûl ch' al slargj chê « sô tende », ma dome si dîs!...

\* \* \*


Nô no 'o vin che dîs frugâs da la meserie. Ricuarz e  
svindics tra tante maluserie... E si ten dur!

\* \* \*

Si dîs ch' al sei il Tilimènt a dividi in doi la Region e no  
si pense, invezzi, che 'e son i umigns, che la squàrtin.

\*\*\*





P. G. R.  
IL 5 GENNAJO.

*Fûcs de Pifanîe. Un frut al cole tal Natison, sot i vôi des  
lavandèris.*

*1888 - Cividâl*



# Zenâr

*Al jeve il soreli a' oris 7,40; al tramonte a lis 16,45.  
Lune plene il 2; ultin quart il 10; lune gnove il 17; prin quart il 24.*

- |   |    |   |   |   |
|---|----|---|---|---|
| ✠ | 1  | M | Prin di dal An - Marie S.S. Mari di Diu | ☺ |
|   | 2  | M | S. Basili il Grant - S. Gregori         |   |
|   | 3  | J | S. Gjenovefe                            |   |
|   | 4  | V | S. Aquilin                              |   |
|   | 5  | S | S. Melie                                |   |
| ✠ | 6  | D | Pifanie                                 |   |
|   | 7  | L | S. Lucian                               |   |
|   | 8  | M | 40 Martars                              |   |
|   | 9  | M | Batisim di Jesù                         | ☾ |
|   | 10 | J | S. Aldo                                 |   |
|   | 11 | V | S. Paulin Patriarcje di Aquilèe         |   |
|   | 12 | S | S. Maurizio                             |   |
| ✠ | 13 | D | S. Ilari di Poitiers                    |   |
|   | 14 | L | S. Cristiane                            |   |
|   | 15 | M | B. Duri di Pordenon                     |   |
|   | 16 | M | S. Marcel Pape                          | ☺ |
|   | 17 | J | S. Antoni abât                          |   |
|   | 18 | V | S. Liberade                             |   |
|   | 19 | S | S. Mario                                |   |
| ✠ | 20 | D | S. Bastian                              |   |
|   | 21 | L | S. Gnës                                 |   |
|   | 22 | M | S. Gaudenzi                             |   |
|   | 23 | M | S. Ildefonso                            | ☾ |
|   | 24 | J | S. Francesc di Sales                    |   |
|   | 25 | V | Conversion di S. Pauli                  |   |
|   | 26 | S | S. Paule                                |   |
| ✠ | 27 | D | S. Anzule Merici                        |   |
|   | 28 | L | S. Tomàs di Aquin                       |   |
|   | 29 | M | S. Aquilin                              |   |
|   | 30 | M | S. Giacinte                             |   |
|   | 31 | J | S. Zuan Bosco                           |   |

## TAL ORT

Semenâ cevòle; leâ la salate par fâle vignî blancie.

\* \* \*

*Bon dì, bon an! - Dèmi 'na buna man ancja chest'an.  
Dèit o no dèit, - su pal Cual di Savuièt - còcolas foràdas,  
nòlas cul cuc, - tuuu!*

(Tramonz)

\* \* \*

*S'al tona al mèis de zenâr - vent la vâcia e ancia al ciar.*

(Cordenons)

\* \* \*

## IN CUSÌNE

*Pinsa*

Si lessa la sùcia e si schissa e po si cuei ta la cialdera, cun lat, farina di sinquantìn, di siàla e di flôr, par un deis minùs; co è disfredàda si met sùcher, ua, fics a tocùs, fenòi e qualche sidòn di sgnapa. Si messeda benon, si met ta 'na tècia onta cul uèli e si met tal fôr par un'ora e mieza.

(Rizete cjolte su a Tisana)

## I OTANTE ÀINS DI BARBE TONI

*Tre cul fusîl  
sessante cu la svangje.  
J' ài finît otantagn  
e Crist sei laudât.*

*Tre agn di trincèe  
un su la Tofane  
un sul Grapa e un su la Plâf  
e Crist sei laudât.*

*E ancjmò tes orelis  
la mitràe sbrenade  
ch'e stude la sô corse  
dilà dal cret.*

*Ma i miei sessante sacrosanz  
di palût,  
lì duc' in file  
cu la cariole in man  
dentri il paltan ch'al bale  
ciac ciac  
tant che la panze dal purcit.*

*Il paltàn a crostis sui bregons  
e la cjamese ch'e sbrendole in glorie  
come la bandiere dal regiment.*

*Trentequatri fantarie  
tre agn di trincèe  
zaino, moschet e rancio di galere.*

*E po' trincèis imò  
cul picon  
cu la pale  
cu la svangje  
e il frêt che ti strighie  
e il soreli che ti strizze  
e la miserie porche.*

*Mi è restade la pipe.*

*Pipe de Tofane  
pipe dal Grapa  
pipe de Plâf  
e pipe dal palût.*

*Pipe de tiere imbonide  
pipe di radighe fuarte  
ch'e ten bago di secui  
ch'al fâs spudâ catram.*

*Cjare ché pipe  
cul fum di ilusions  
di medàis e pensions  
e chest spudâ catram  
che ti disgrope l'anime,  
barbe Toni.*

MARIA FORTE  
(tr. - Bùje)

## CARÀTARS

Elvire, un caràtar d'aur. 'E jere simpri légre. Nancje che sô mari 'e ves cjantât par dut il timp de gravidanze. Al è un don di nature chel di savê viodi un spraz di seren ancje tes situazions plui neris de vite, ma jê, in plui, 'e saveve cjatâ un fîl còmic magari in tune tragjedie. Al jere un plasé a vivi dongje di jê. Aviarte e sincjere 'e veve simpri tant di contâ, ma no jere petezzone, 'e svuedave il so sac, ancje quanche nissun j domandave nje.

'E veve sposât l'om adat par jê: pocis peraulis, serio, cujet. Cussì si compensavin e a' fasevin une copie ideâl.

Quan' ch'al vignive a cjase di vore, strac, lui al taseve e jê 'e fevelave, 'e fevelave e j contave dai fruz, des spesis, des pensadis e di dut ce ch'e veve fat e viodût vie pal di. Gino la lassave fevelâ e al scoltave un pôc, come che si fâs cu la radio biel lavorant. Qualchi volte, ch'al jere preocupât fûr di misure, j diseve pitost rabiôs: — Ma tâs mo, tâs un pôc cisile di femine! Tu sês piês di une radio! — Jê no se cjapave a pet, 'e fermave par un moment e dopo, magari calant di tono, 'e continuave la musiche. No podeve propit tignî la bocje a freno ancje se j displaseve di stufâ il só Ginut tant bon. Cussì ogni dì, tant che l'om al si jere abituât a chê mosfere plene di vite. Pe veretât lu judave ancje a distacâsi cul pinsîr dal lavôr cun duc' i siei grops. Ce tantis voltis che une ridade di Elvire lu veve judât a disgrupâju.

Ma une sere la femine no veve vôi di fevelâ. Si po vê vôi di tasê, no îse vere? E lui meraveât: — Ce àstu? E jê:



— Nuje. — Ti sintistu pôc ben? — No. — Àstu cenât?  
— Sì — Ti àjo fat alc di mâl? — No — E i fruz indulà  
sono? — Mah!... — 'E continuave a fâ lis voris, ma la  
bocje no mandave fûr plui di une silabe. Gino al si metè a  
cenâ, ma al sintive che j mancjave une grande companie,  
nol mangiave nancje vultintîr. Al finì in premure, daspò al  
gjavà alc dal tacuin e al lé dongje la femine: — Vire, ti  
prei, torne a fevelâ. Viôt, ti doi cent francs. — E jù une  
ridade ducidoi!

Une dì, a gustà lavie di so cugnât, Elvire 'e faseve tasê  
duc' parvie dal sò contâ e ridi. — Orpo, — j fâs il cugnât  
— se concjert! Come ti sopuartial Ginut? — E jê: — Be-  
non, al mi pàe a pat che jo j feveli simpri!

LUCIA SCOZIERO

(Udin)

## I PLAZ CH'A SVÒLIN

*« Sono o no sono? » al si domande  
cu 'l nâs par ajar il puar vivènt.*

*« Ju màndial Marte opur de tiare  
ciàpino il volo pal firmamènt? »*

*Al è un misteri, che 'l folc lu trai!*

*Ma qualchidun al rît sot cozz!*

*Jo par cont miò no stenti a crodi  
ch'a sei la storie de lune in poz.*

*Se chei di Marte son progredìs  
tant plui di nô, anìn, ch'a vègnin  
a fânus viarzi 'ne volte i voi  
e a vivi miei ch'a nus insègnin!*

GUIDO CUDIN  
(Ròncis di Latisane)

## PROIBIZIÒNS

In Inghiltere si permèt dut chel che nol è proibît.


In Germanie si proibîs dut chel che nol è permetût.

In Francie si permèt àncje chel ch'al è proibît.

In altris bàndis si proibîs dut, àncje chel ch'al è permetût.

In Italie si permèt dut ma soledut chel ch'al è proibît.





P.C.R. il 21 FEBBRAIO 1874. NATALE GIGANTE

*Natale Gigante al prè la Madone par ch'e j salvi lis vâcjs.  
1874 - Madone des Gràziis - Udin*

# Fevrâr

*Al jeve il sorèli a' oris 7,25; al tramonte a lis 17,25.*

*Lune plene l' 1; ultin quart il 9; lune gnove il 16; prin quart il 23.*

	1	V	S. Sever	☺
	2	S	Madone Cereole	
✠	3	D	S. Blàs	
	4	L	S. Gilbert	
	5	M	S. Aghite	
	6	M	S. Armant	
	7	J	S. Teodoro	
	8	V	S. Onorât	
	9	S	S. Polonie	☾
✠	10	D	S. Silvano	
	11	L	B. V. Marie di Lourdes	
	12	M	S. Reginald	
	13	M	S. Foscje	
	14	J	SS. Cirillo e Metodio - S. Valantin	
	15	V	S. Faustin	
	16	S	S. Giulian	☺
✠	17	D	S. Donato e co. martars di Concuardie	
	18	L	S. Simeon	
	19	M	S. Mansuet	
	20	M	La Cinise	
	21	J	S. Norine	
	22	V	S. Margarite	
	23	S	S. Pieri Damian	☾
✠	24	D	I di Coresime	
	25	L	S. Sergio	
	26	M	S. Romeo	
	27	M	S. Leandri	
	28	J	S. Svualt	
	29	V	S. Panfili	

## TAL ORT

Plantâ ai e patâtis; semenâ: blêdis, cesaròns, favis, fenòli,  
ravaneî, savôrs, spinàzis.

\* \* \*

*Se fa cialt a fevrâr - no tu èmplis il solâr.  
Se no si copa la gialina di Carnevâl - 'a si copa par un mâl.*

\* \* \*

*A Pluver, 'e son chês bièlis,  
a Bordan 'e je la flôr,  
a Tarnep a' son fassinis  
e ancje chês fâ il gjàul di lôr!*

(Venzon)

\* \* \*

## IN CUSÌNE

*Mignestra di risi e lat e luiània*

Si met lat e un nèn di aga, un murèl di luiània aparon, sal  
e si fâs bulî. Dopo si met i risi e si fâs bulî fin che la mi-  
gnestra è cota.

(Rizete cjolte su a Pielûnc)

## SMILITARIZAZIÒN

*Benòn! No varìn plui uèris.*

*I militârs 'e vièstin in borghês, la ferme 'e je ridote, i soldàz 'e fàsin i pompîrs, i controlôrs dai rioplânos 'e son smilitarizâs. Cumò 'e domàndin la smilitarizaziòn ancje i finanzîrs. Nome cussì, 'e dîsin, 'o podarìn fâ pajâ lis tàssis ai evasôrs. Si trate di vincjecincmilmiliarz ad an!*

*E alora smilitarizìnju subit!...*

*Ma il Stroligàt al pense che sei une barzelete.*

Il Stroligàt

## I CROSTUI

I Rebuson chel che vevin, are dut di prime. Tas bòtis, tignudis come reliquis, il merlot, cabernet e il sclopetin passît erin vins di esposizion. La ue di S. Ane, in bieles esposizion, pleave lis vîz che si rimpîàvin atôr, atôr la lissivaie imbombade di verdramp. Bastave passâ il Patoch e rivâ te braide par spiciâ fics blancs e neris, baracocui che si pituràvin za a le prime cialdane o piruz che nasavin di rosis e si lassavin taiâ come spongie. Nel tinelut, piciâs cul spali ai trâs che lavin da mur a mur, musès, marcandièlis e argel che cricave sot i dinc'. Un parsut simpri a tai, are strinzût in tun scanzel di un taulin che si moveve, tant une femine, dome lu si tocjave. Atôr, atôr su lis breis erin poiâdis lis formis di latarie fresc o stagionât. Scugne propri dî che cui rivave in famee Rebuson, ciatave il miôr de stagion. Cussì capitave che duc' i sorestanz di pas, tra l'Iudri e il Natison si fermavin a sercjâ dutis lis primizis.

Une dì, prime de Madone di Avost, ari ancjemò un furtat, ti rive un sdrondenon di centuriòns de milizie cun aquilis di arint e aur, fassis e cordons di duc' i colors, che ti iemplin il tinel. Are chist il luc plui fresc' de ciase, cun tun pavement di piere che il talpinà dal timp lu veve slissât. Un aierut, che calave dal Corade faseve movi lis tendis ricamadis che lassavin dome smiciâ il soreli che sburtave sui balcon.

Nono Tite, dopo vê saludât a vos alte, clame sô femine e domande:

« Vige, vâ a preparâ i crostui ».



Duc' si zirin e ancie none, crodint di vê capît mal:

« Ài sintût ben? Tu às dit crostui? ».

« Pocemut, Vige, no tu viodis ze carnevâl che vin in ciase! ».

Di chê volte, co rivave qualchi sorestan, puartavin nono a fâ doi pas te braide.

SERGIO REBUSON  
(Albâne di Prepòt)

## LA NAPA NERA

*In da la cjasa vecja  
na vevin da distrugj  
il fogolâr,  
na veva da 'zî-jù  
chê napa nera  
cjalda di flames  
e pí encjamò di amôr.*

*Pareva, sot di j',  
una preghiera ch'a 'zeva-sù,  
la vûs dal foc  
e il sclopetâ dai stecs,  
il cjalt odôr di pâs  
da la polenta,  
i sospîrs serens  
dai nestris vècjus  
e il lôr contâ  
di rubes tant lontanes  
fra una presuta e 'n'âtra  
di tabac.*

*E prin da 'zî a durmî  
encja il rosari  
al 'zeva-sù par ì:  
una preghiera vera,*



*na cantilena fôr da la bocja,  
ma un sospirâ da l'anima  
su par chê napa nera  
che ades na è pí.*

*E dopu,  
'n da l'aria frescja e scura  
da la not,  
fôr dal camin,  
ducj, cul fum,  
belbelu in prufission  
cuntra le' steles.*

*E davôr,  
chei rosaris di côr  
che su pal cêl pocavin  
vûs, sospîrs e odôrs,  
sempri pí in sù:  
'n dal grim dal infinît.*

*Lontan di chista cjera  
restada cencia il cjalt  
dal fogolâr  
e la sô napa nera.*

ALBERTO PICOTTI  
(lengaz di Sequals)

## LETARIS DAL TIMP DI UERE

— Pari, 'o vin cjapade la Galizie.

— Fî, vèndile, mandimi vinc' coronis e tenti il rest.

\* \* \*

— Pari,chi 'o stoi mancul mâl, ma 'o soi al vert.

— Fî, reste lì plui che tu puedis parceche culì a' còlin  
za lis fueis.

## CJÒCHIS

— Ustîr, ch'al mi puarti un litro di neri e une tazze.  
Finît il litro al clame: — Ustîr, ch'al mi puarti miez litro.  
Finît ancje chel al clame un quart e, dopo dal quart, un taj.  
Finît al taj al fâs une cunsiderazion logiche: — Cjale mo',  
mancul 'o bêf e plui mi incjochi!

VICO BRESSAN  
(Roncis di Monfalcon)



*Si gjavin àrbui: un contadin al dramasse insieme cul morâr.*

# Marz

*Al jeve il soreli a' oris 6,45; al tramonte a lis 18.*

*Lune plene l' 1; ultin quart il 9; lune gnove il 16; prin quart il 23;  
lune plene il 31.*

	1	S	S. Davide	☺
✠	2	D	II di Coresime	
	3	L	S. Marino	
	4	M	S. Casimîr	
	5	M	S. Adrian	
	6	J	S. Vitôr	
	7	V	S. Felicite	
	8	S	S. Gerard	
✠	9	D	III di Coresime	☾
	10	L	S. Dionisi	
	11	M	S. Costantin	
	12	M	S. Inocent	
	13	J	S. Cristine	
	14	V	S. Matilde	
	15	S	S. Zacarie	☺
✠	16	D	IV di Coresime	
	17	L	S. Patrizi	
	18	M	S. Salvadôr	
	19	M	S. Josef spôs di Marie Vergjne	
	20	J	S. Sandre	
	21	V	S. Benedèt	
	22	S	S. Benvignût	
✠	23	D	di Passion	☾
	24	L	S. Romul	
	25	M	Anunciazion dal Signôr	
	26	M	S. Manuel	
	27	J	S. Lidie	
	28	V	S. Castor	
	29	S	S. Secont	
✠	30	D	Domenie Ulive	
	31	L	S. Beniamin	☺

## TAL ORT

In fuart di lune e in tune zornade ch'a no vébi l'erre si semene il radìc. In vècio di lune si semène: râfs, blèdis, caròtis, vèzsis, salata, cesaròns, puàr, sutìve, savòrs, spinàzis, sùcis. Si plàntin patàtis. In ricés si semènin pomodòros, peveròns, melanzànis.

\* \* \*

*Met la blave cu la gjachete e il forment in mànis di cjamèse.*

\* \* \*

## IN CUSÌNE

### *Jote di cavoce*

Si tae a tocs la cavoce e si le met a bòli; si la fracje, si reònc' aghe o lat e ont. Quan' che 'a bol a' si met il sal e la farine di polente. Quan' ch'a è cuete si met dentri i fasui za cuets.

(Rizete cjolte su a Sudri)

### *Risi cu li' sùcis*

A' se fa bulì li' sùcis; co i son còtis a' se giava l'aga, a' se schissa li' sùcis e a' se met dentre ta la pignàta al lat. Quan' ch'a bol a' se met dentre dô' cìcheris de risi e a' se lassa bóle fin ch'i son cós.

(Rizete cjolte su a Monreâl)

## TÀSSIS

*Tal 1981 'o pajrìn lis tàssis dal 1976, chês aretràdis, e mièzis ches dal 1977. Chest al sucedarà tai païs taramotâs. Lis pajarìno cu lis alìquotis d'in ché volte o cemût?*

*Su chest argument nissun, 'o dîs nissun, al môf verbo. Il Stroligât al à un dubi: Ìsal un argument che nol interesse nissun parvie che buzarònin lis tàssis?*

*Il guviâr nus insegne: 400.000 no àn pajàde l'una tantum dopo cinc ains, e alore il guviâr, invezì di fâjur pajâ la multe, al à dite che àn timp ancjemò doi ains... E dopo?...*

Il Stroligât



## FRIÛL

Come  
un risèt  
ch'al stenti  
a butâ-fûr  
cussì  
il Friûl  
al tache  
a risurî:  
i soi camins  
'e tòrnin  
a fumâ,  
i contadins  
'e àrin  
la taviële  
e i fruz  
jemplin i borcs  
sigant  
il lor morbin.  
In chel moment,  
une cjampane  
viere  
su quatri cavalez  
'torne a sunâ  
il so din-don  
di vite.

GIANNINO ANGELI  
(Felèt)

## TRESEMÀNIS

Zuantoni doman al partive pal Venezuela e al jere lâa a saludâ siôr Camilo, ch'al jere vieli e malât. Chest ca j dîs dut avilît: « Mandi frut, no si viodin plui, satu ». « Eh, anîn po, sior Camilo, parcè dîsial cussî? Nol è mico tant vieli lui, no 'nd' à nancje novante! ». E lui: « Nol è par me, frut, che lu dîs, ma satu, cun tanc' areoplanos ch'e còlin ».

\* \* \*

Checo di Ghite al jere simpri stât un omp preident une vorone. Cui soi traffics di marcjedant, rivât 'e pension, al veve calculât di podê vivi di rendite ancje cu la svalutazion in cors, fin a novantecinc agn. « Ul dî che se mi vâ mâl », al diseve, « dopo 'o larai a vôre sot paron ».

\* \* \*

Tite Musson al jere simpri stât une vôre tacât 'e robe e ai bêz. Co al vignive a marcjât a Tresesin e j tocjave di bevi qualchi tai ch'e pajavin i coparis, nol leve gran a pissâ in dut il dì e al tornave a cjase sglonf par lâ a fâle sul sò ledanâr. Rivât in pont di muart, Musson al à vude la fuarze di dî lis ultimis peraulis che no son stadis: « Us saludi, e cirît di volêsi ben »; ma pitost: « No stait a spindi bêz par me; cjolêt une casse di seconde man ».

Bete ch  di Scroc 'e jere une femine cuss  pizzule che la clamavin la pet che. A viodile si devj d s, dodis agn. Invezzit a'n'veve passe vinc'. Tant al   v r ch'e veve il mor s e cum  'e veve di marid si. 'E semeavin pari e fie, ma insome 'e jerin l z dal predi a f  lis cjartis. J d s il plevan: « Mostre di Bete, tu  s di maridati pitin ne come che tu s s? ». E j  a colp: « Eh, si r plevan, ogni braide   la s  entrate! ».

\* \* \*

Tal '44 ch'o stevin fasint la scuele guide cun tune Balila '33 a gasogjeno su la strade di Nimis, tre ribei 'e saltin f r di un cjamp di sorc e nus fermin cu lis armis in man. 'E volevin purt nus vie la machine. « Viodeit » dissal l'istrut r, « che ch  machine cul  'o sai dopr le nome jo; e che par pod  part  'es vot, bisugne jev  almancul 'es quatri a impi  il gasogjeno ». Alore un ribel j d s a chel altri: « An n, an n Furia, che se nus tocje di scjamp  si st  mancul a p t ».

\* \* \*

Il Peo al contave di ch i di Nimis: « Buine int, ma se tu ur domandavis une fete di salamp o une scae di formadi, ti disevin: — Magari fantat, no v n nie nancje par n ! — E ti zuravin, tiransi la piel dai v i. Dopo, co i todescs 'e  n brus t il pa s, al jesseve il frico pai balc ns ».

\* \* \*

Co jere vignude la zornade di partî pe Argjentine, Checo di Mando al à bussade la femine su la puarte e j à dite alzant i braz parajar: « Arivedersi o fèmena, quando che il ciel vorà ». Checo j à dade la cause al cîl e nissun lu à pui vidût a cjase.

\* \* \*

Tal '33 co 'e lavoravin par puartâ l'aquedot a Tresesin, 'e jere di mode une operete furlane che si clamave « Cjôl Tunin ». Al jere un ajar che duc' 'e cjantavin, musiche e peraulis legrîs: « No sintistu ninîne lis cjampanis, no sintistu ch'e disin cjôl Tunin ». La spetative dal aquedot, ch'al veve sbusadis dutis lis stradis de cumune, 'e jere tal che la înt al « Cjôl Tunin » j vevin gambiadis lis peraulis: « No sintistu ninîne lis cjampanis, no sintistu ch'e disin l'aghe 'e ven ». Quant che però par vê l'aghe bisugnave pajâ il cunsum, alore 'e vevin finît di cjantâ. E sot cu lis protestis: « Cjale ca, in ce stât, scugnî pajâ ancje l'aghe di bevi! ».

ALAN BRUSINI  
(Tresésin)

## FILUSUFIE DE CREAZION

Pieri Norât, un bocon di cristian ch'al justave cjârs te fârie dal paîs, nol dave di vore al gustâ, e 'e cene, cence un butiglion di vin denant, dongje il plat.

Lis pietanzis, al diseve, no quistin savôr e no rivin a jessi prontadis pe' digestion, come ch'al ocôr, se ur mancje... l'ambient ùmit. Une volte la femine, posto che il butiglion non durave quasi mai plui di un past e che Pieri, dopo vê mangjât, di bot si indurmidive su la cjadrée, 'e cirì di misturâ chê umiditât.

'E spietà che l'om al fos sentât, e cjalanlu par traviers:

« Sint mo, Pieri, — 'e tacà dute dulinziose — 'o capis che ven sêt qualche si guste. Ma no saressial miôr, par stâ in regule, che ogni tant tu slungjassis il vin cun t'un pocje di aghe? ».

« Tas, stupidate — dissal Pieri — no sastu che nestri Signôr al à fate le scusse ai àsins de ûe parceche no jentri aghe? ».

MANLIO MICHELUTTI  
(Udin)





*Un bò al scuarnasse Marie Specogna sot i vôi dal so omp  
ch'al ten la uàrzine.*

*1895 - Madone des Gràziis - Udin*



# Avrîl

*Al jeve il soreli a' oris 5,55; al tramonte a lis 18,30.*

*Ultin quart di lune il 8; lune gnove il 15; prin quart il 22; lune plene il 30.*

1	M	S. Ugo	
2	M	S. Francesc di P.	
3	J	Joibe Sante	
4	V	Vinars Sant	
5	S	Sabide Sante	
✠	6	D Pasche Majôr	
7	L	Pascute	
8	M	S. Redent	☾
9	M	S. Ilde	
10	J	S. Terenzi	
11	V	S. Franco	
12	S	S. Zenon	
✠	13	D In Albis	
14	L	S. Liduine	☺
15	M	S. Cressenzi	
16	M	S. Bernardete	
17	J	S. Nicêt	
18	V	S. Gjaldin	
19	S	S. Eme	
✠	20	D III di Pasche	
21	L	S. Anselm	
22	M	S. Italo	☾
23	M	S. Zorz	
24	J	S. Fedêl	
25	V	S. Marc - Fieste de Liberazion	
26	S	S. Marcelin	
✠	27	D IV di Pasche	
28	L	S. Vidâl	
29	M	S. Catarine	
30	M	S. Josef Coteleng	☺

## TAL ORT

In cressi di lune semenâ fasui che filin, in cal di lune fasui bas, uainis, jarbe-rave, blèdis, caròtis, codùmars, cocìns, rucule, basili; raventâ pomodòros, pevaròns, melanzanis, sèlino, latuje.

\* \* \*

*La prime joibe di avrìl - si samene il basili gentìl.  
Se al plûf Vinars Sant - arsùre l'an dut quant.*

\* \* \*

*A Capriva son li' cozis,  
a Morâr son i cozârs,  
a Cormons son chei bieî mòros  
ch'e samèin tanc' violârs.*

(Cormons)

\* \* \*

## IN CUSÌNE

*Sopa cu li' ranis*

Se scaltrìs un puocia de sevòla e de ai ta oiu e butiru e se giava l'ai prin ch'al deventi ros. Se bùtin dentra ta la pignàta li' ranis ben curàdis, aga e sal. Quant ch'a son cuòtis a' se tìrin fòur dal bròut e a' se lèvin i uos, se met la ciar dentri ta la pignata e po se buta dut parsora al pan, a fètis, pareciàt tal plat.

(Rizete cjolte su a Cordenons)

## TANASSI E LEFEVRE

*Dulà cjatàiso une justìzie plui rapide di ché nostre? Dopo vèu ricognossûs colpèvui e dopo vèi fat nasâ la presòn, 'e son stâs liberâs e mitûs tes mans dal « Centro Sociâl pai majorènis » par fâju pintî dai lôr pecjâs.*

*Il Stroligât al è stât tant content di cheste decisiòn che nol podeve plui finî di ridi.*

Il Stroligât

## 'NA ROSA 'A E' LA MUART

*'Na rosa 'a é la muart  
ch'a cjanta ferma  
sora li' spini'.  
dal siò baraciâr.  
'A impia,  
tun ceil di memoria,  
il vivi,  
sô radîs grama.*

## L'ULTIMA PERAVALA

*Al soreli  
l'ultima lûs,  
e a che ch'a van  
l'ultima peravala  
tu 'i domandi,  
par ch'a resti,  
tra vita e muart,  
il lac'  
ch'al ten il jessi  
tuna reson  
da no distuêisi  
da la cjera.*

NOVELLA CANTARUTTI  
(Spilimbèrc)

## PIRIN E MIUTA

Nissun ce dî, 'a la veva dumisticada pulît la Miuta, il Pirin, ch'a cugneva servîlu da barba e da piruca. Ogni matina 'a cugneva judâlu a viesti: botonâighi la cjamêsa, parce che lui al 'veva deic' gros comi musès e nol si cjatava cun chêi bisitùs di batòns, 'a cugneva fâighi cjatâ, da piè da la scjala, li' dalminis cu' li' pontis voltadis da la banda dal zî-four, parcé a lui no j zeva da cugneisi voltâ par mètilis su, 'na volta rivât da bas, e s'a no li' cjatava voltadis al runtinava comi il maltimp su pa' la pora Miuta. Apena dentri in cusina al voleva cjatâ pronta, ogni matina, la boccia da la sgnapa cul scugjlin par dongja, però par travasâla al si rangjava di bessoul. Dilunc la zornada, co fevin li' vòris par la centa-via, Miuta 'a cugneva preparâighi ducju' i impresc' in man, po, lui al parava sot li' vòris da fin e Miuta 'a cugneva rusumâsi dutis chês pì grevis e di fadîa. Co vevin da tràî l'urina da li' vacjs lui, cul elmet dai mucs, al emplava il barelòt e jê, dopu implinît 'a cugneva tirâlu ju pal prât par zî a spândilu. Co vevin da seâ pa' li' vacjs lui al pogneva l'erba cu' la falc' e jê 'a cugneva rangjâsi a restelâla, cargâla e pocâ dentri la cariola cjamada, fin tal stâli e incjamò, lui, a' j poiava parsôra il riscjel, la falc' e il codâr cussì al podeva cjaminâighi davori cu' li' mans in sacheta.

Su l'ora dal mangjà, la pora Miuta 'a era dut un trai-e-dai, 'a si smaneava par fâighi cjatâ dut pront, basta no sintilu bruntulâ. Lui al si sentava comi un pacju e s'al si necuarzeva ch'a mancjava alc al tucava cu' li' canôlis la taula, Miuta 'a faseva un salt da la cjadrea e 'a coreva a tòighi.



'Na dì a' sucê chi, Miuta, 'a à cugnûz zi dal mièdi parcé da un po' di timp no steva ben e chel a' la manda tal ospedâl par fâ analisi.

Pirin al si necuare' chi cencia Miuta al è cul cûl par cjera; nol 'varès mai pì crudût chi chel scandai di femina 'na quarta sòra cjera, pì cotulis chi cjâr, fòs stada tant important in cjasa. Pì intrigât di dut al si cjatava sul fâsi da mangjâ: nol saveva còi nuja. Al provava a frusignâ cul firsurin par fâsi qualchi fertaia, ch'a j pareva la pì scleta da fâ, ma nol saveva ta ce bûssul ch'al era il sâl e cussì, 'na volta 'a l'â mangjàda cul sucher, 'n altra volta cu' la soda, apena su la tersa a' j l'â intivada justa. Al si riduseva spes a pan e formai ch'al era sempri pront.

Intant al tirava cul flât la Miuta e al sperava ch'a j la mandassin a cjasa comedada pulît par ch'a j duri un pec' a lunc.

Tal ospedâl, Miuta, 'a la vevin mituda ta 'na stansia cun altris tre fêminis tant pì zovinis di jê ma dutis maridadis. Dal prin dì 'a menava la bavela vaingulànt pal siò Pirin chi sugûr al si cjatava intrigât a cjasa cencia di jê. « E vâno-vâ ch'al mori da fam, chi lui nol sà scjaldâsi nencja un ouf, ch'al cjatava sempri dut pront! Cemont il fasarài cencia di me? Pôr il gnò Pirin! Lui a nol sa nencja dulà tîli la sedòn par mangjâ la mignestra. Cemont il fasarai a batonâsi la cjamesa, la matina; cui ghi voltarà li' dalminis dabàs la scjala...! ».

Par duta la prima dì di ospedâl 'a à messedât 'stu musin fin chi, la sera, chê' altris tre par dongja a' erin siliadis da chel businum ch'a' j era diventât stufadic' e la pì moscardina 'a è comi sclopada e à tacât a fâighi la cuiàbita:

« Ben, Miuta, sêo mata a fâvi sclava dal om in 'sta fata? No vedêo chi pì vi fasèit peciota e pì al vi pescja parsôra? ». « Eh, ma jo j ài nomi lui! » 'a dîs Miuta. « Sî, ma encja lui al vi à nomi vô ma al pensa nomi par sé e al lassa chi vô vi rangjâssis bessola! ».

Intant encja chê' altris dôs a' si son fatis sot a soflâ ta li' boris. Una 'a dîs: « Il gnò om al mi lava encja i plaz! ». Chê'altra: « Il gnò al mi puarta il cafè tal jet ogni matina! ». Miuta 'a dîs: « I veit reson ma si no fai cussì cul gnò Pirin al businarès di e nòt! ». « E vô lassâilu businâ! Co 'l é cencia saliva vedareit ch'al cessa! ». Miuta 'a tacava a clòci e pì lour a' cjacaravin e pì jê 'a j deva reson. Tal doman 'a la pensava 'zà comi chê' altris. Po ta li' 'zornadis devour a' àn savût istruîla e cunvîncila cussì pulît chi jê no crodeva l'ora da tornâ a cjasa par frontâ il Pirin e insegnâighi cun ce len ch'a si fai coronis.

La prima matina, dopu tornada a cjasa, Miuta no jeva su par prima comi ch'a era usa fâ. Pirin al steva sempri in speta ch'a saltas four dal jet. La sveglia 'a veva 'zà sunât e nissun dai doi al si niciava. Pirin al dicît da dâighi un tuc cul telon ta li' canôlis po a' j dîs: « No si jevi voi? ». E jê: « No incjamò! ». — « Ce àstu mâl? ». — « No, no, j' stai benon! ». — « Ma a' tocja jevâ a dâj 'na ciafa a la vacja! » — « Poben, jeva tu intant! ». Pirin nol capiva nuia ma al fai il sfuarc' e al salta four. Al taca a viêstisi po a' j dîs: « No jèvistu o botonâmi la cjamêsa? ». — « No! ». — « Ti sàs chi ài i deic' massa gros par scju maladès di scju batons! ». — « Poben: spiciû! ».

Pirin, allora, al spalanca i voi spiritât; no la veva mai sintuda in vita sô a rispûndighi cu' la lenga cussì spiciada



e a' j disbròcja 'na ocjada di chês chi 'na volta a' j bastava a fâla trimâ comi 'na foia di poul ma jê no si scompòn nen-  
cja. Allora, cu' la fota ch'a j buligava tal stomi, a' j dîs:  
« Ben, ce, ti àni tignuda cul cjâf a soréli chêi dal ospedâl? ».  
— « No, no benedet; a' mi àn viert i voi, al è ora da finîla  
chi jo j' seipi la serva e tu il paron! ». — « Ooh!, èsi chista  
la riceta ch'a ti àn dat i mièdis? » al ciga Pirin cu' la vous  
rûsina e gratadicia. « Jo j' cordevi ch'a ti comedassin in  
miêi e invessi a' ti àn ruvinada. J' ài sempri dit jo chi chêi  
dal ospedâl a' son ducju' mussafadîs, saranèi, nassûs par  
distruzi. J' ài doprât 'na vita a orlevâ 'na femina mancupesu  
e lour in quatr-cinc dis a' mi àn scjapunît dut il gnò lavôur,  
chêi salabrâchs! Oh Signour, Signour in ce mondat chi  
vivîn! ».

ALDO TOMÈ  
(Manià)



*Une fèmine 'e dîs grazie 'e Madone e a san Zôrs pal so omp  
ch'al è tornât vîf de uere.*

1918

# Maj

*Al jeve il sorèli a' oris 5,10; al tramonte a li' 19,5.*

*Ultin quart di lune il 7; lune gnove il 14; prin quart il 21; lune plene il 29.*

✠ 1 J Fieste dal Lavôr - S. Josef Lavoradôr

2 V S. Atanasi

3 S S. Filip e Jacum

✠ 4 D V di Pasche

5 L S. Leo

6 M S. Gjudite

7 M S. Stanislau

8 J S. Vitôr

9 V S. Luminose

10 S S. Jop

✠ 11 D VI di Pasche

12 L S. Pancrazi

13 M S. Mafalde

14 M S. Matie

15 J S. Sofie

16 V S. Ubalt

17 S S. Pasquâl

✠ 18 D La Sense

19 L S. Ivo

20 M S. Bernardin

21 M S. Gisele

22 J S. Rite

23 V S. Florenz

24 S M. Ausiliadorie

✠ 25 D Pentecostis

26 L S. Filip N.

27 M S. Ustin

28 M S. Ade

29 J S. Massimin

30 V S. Ferdinand

31 S S. Canzian

## TAL ORT

Cui ch'a nol à semenât a avrîl al pò semenâ, in cal di lune, codùmars, radic, blèdis, spinazis; al ravente pomidoros, melanzanis, pevaròns, sèlino, cauliflòrs.

\* \* \*

*Prima gjueiba di maj, - met i fasoi ch'a 'n ven assai.  
Tal meis de mai - proiòt lègnis e formài.*

\* \* \*

*Lis ciampànis di Plasencis  
no si puèdin mai cordâ,  
lis fantàtis di Pozalis  
no si puèdin maridâ.*

(Feàgne)

\* \* \*

## IN CUSÌNE

*Brût brusât*

T'une farsorie di fier a' mètìn l'ont. Dopo si met la farìne di formènt e si brustolìs plan, fin ch'a divente rosse; a' si met aghe cialde e sal; si messede e si lasse cuei par dîs minùs.

(Rizete cjolte su a 'Zui)

## TARAMÒT

*Quatri àins fa: mil muars e vincjesièt cumuns distrúz. E dopo: comission sòre comission, plans regolatòrs generai e particulârs, zonis industriâls e artigianâls, riòrdinos fondiàriis, borcs rùstics, centros stòrics, zònis verdís, zònis agrìculis, lez Bucalossi, espròprios, vùncui di ogni gènar e dut par un Friùl plui biel e ordenât.*

*No seso contenz? Ricoréit al T.A.R. (Tribunâl Aministratîf Regionâl) — justìzie sigure e subit — opur domandâit un consèi al Stroligât.*

Il Stroligât



## NOSSENSA

Soreli grand di mai ch'al scialda  
la vita da li robis  
la'tòr pai ciamps, la'tòr pal mond  
e a strops sora la ciera dal curtil.  
Ciaviéi zintî di un nini,  
che uchî s'inflamin  
a lamps di oru vif  
e ulî par zouc a' si distudin.  
Piedûs discols atêns 'cia lour  
tal gran se fâ  
da li manutis pépulis ch'a zûin.  
tal polvar tamesàt dal timp.  
Lavrûs che a stimp a' giùrlin  
di robis grandis,  
musuta santa che la mama  
a cûin tornà a lavà.  
Vulûs selèsc' ch'ai crodin sérius  
a dutis che busutis e grunûs  
di ciera e savalòn,  
che po la nona prin di sena  
cu'la scova  
bruntulant 'a torna sempri  
a vualivà.

RICCARDO CASTELLANI  
(Ciasarsa)



## CIAPADIS CA E LÁ

Zaneto al porcone in tal so ort parcéche tant lavorâ e nie cjapâ-su.

Al passe in motorin un zovenot plen di pêl su la muse e cu la ghitare su la schene: « Parcé séso rabiôs? » j dis.

« 'E jè nome grame! ».

E il ghitarist: « Asfaltàilu! ».

\* \* \*

Un cjan al à pize in te schene e si spacote. E il pulz, dut inrabiât:

« No lassin nancje mangjâ une bociade in pâs! ».

\* \* \*

Min al cjate so copari ch'j robe panôlis in tal ciamp.

« Orpo, Bepo, 'o resti!... ».

« E jo... 'o voi ve', alore! » j dîs il copari.

\* \* \*

« Parcé scjâmpistu? ».

« Parcé che Gjedeon mi côr daûr par dâmi tantis pidâdis tal daûr, al à dit, di fâmal vignî ros come une angurie ».

« Poben, pote, tu ti séntis e dut al è risolt! ».

\* \* \*

Nol è ver che i frutâz di vué no tègnin cont. Infatis, par fâ culumie, cuanch'e van in motorin, 'e cîrin di doprâ une ruèdule sole.

GUIDO MICHELUTTI  
(Udin)

## BUINIS SPERANZIS

Senze fâ il non dal paîs, 'o riscj il non dal galantom: Gjelindo Fadon, classe 1886 (93 agn!). Salût di sclapâle cui conis, gnarvidure tant che nudrît di madracis.

Moladis lis brenis de campagne al fî, nol à lassât paraltri di lâ indenant lui a governâ il vignâl e a atindilu in dut e pardut. Ma il fî j stava daûr plui che cu la code dal vôi. Une dì al lume il vecjo insomp la vigne, dongje la vasche dal vidriûl turchin, ch'al sbisiave te tiare, scrofât. Lu lasse fâ ma po', bessôl, al va a viodi. Al cjate là insomp, impastanade te tiare, une frascjute alte sì e nò un pâr di quartis.

La volte che si cjàtin a séi insieme tal vignâl e il fî si dà da fâ, dongje la vasche dal vidriûl, al sint il pari che j berle, fasînsi sot a la svelte: « No stâ a talpassâ daprûf di chê vasche! ».

« Parcè di no? » j domande il fî.

« Ti ài dite! » al va indenant Gjelindo, classe '86.

« Ce novitâz sono? Forsit par chel fros ch'o vês impastanât culi? ».

« Ce fros, macacât! no viòstu ch'al è un zariesâr? ».

« E fâ ce di un zariesâr te vigne? ».

« Bambin » al sentenzie il vecjo « Quant ch'o ài fat un pâr di filârs cu la bardache su la schene, no varào dirit di polsâ un fregul te ombrene, che culi no 'nd' è piz! ».

ALBERTO PICOTTI  
(Udin)

## DOI ÓE

*Te às dói óe fèrmus,  
pontàs come gusiélis  
ta chel mostàs  
gualìf  
de veciu fuart.  
E ió  
davant de te  
sói cu li' mans leàdis  
e un grop de peràulis  
ta la gola.*

ROSANNA PARONI BERTOJA  
(Montréal)

## BOLETIN METEREOLOGIC DI FAMÈE

Fèmine nuvolose o tant nuvolose parvie che l'omp no j dà bêt; si varàn cussì precipitaziòns intermitentis vâriis a caràtar nervôs. Pazienze dal omp in rapide, fuarte diminuziòn. Fie in graduâl augment, pur cun la cure dimagrant. Fì, di qualchi mês, prevalen-temment ùmit. Nònos in moviment; in mancanze di stabilitât local: siums agitâz e vèe. Tal lièt, pardut, 'ne maravèe. Te gnôt scure, tes monz e te planure: ploe. Par l' indoman: svèe matutine e rabie, mi somèe!...

\*\*\*



*Doi cjaradôrs 'e ringràzin la Madone e sant'Antoni par vêu  
salvâs da un tal che ju à agredîs.*

*Cjargne - sec. XVIII*

# Jugn

*Al jeve il sorèli a' oris 4,40; al tramonte a lis 19,40.*

*Ultin quart di lune il 6; lune gnove al 12; prin quart il 20; lune plene il 28.*

✠ 1 D S.S. Trinitât

2 L S. Marcelin

3 M S. Clotilde

4 M S. Quarin

5 J S. Bonifazi

6 V B. Bertrand Patriarcje di Aquilee

7 S S. Jeremie

✠ 8 D Corpus Domini

9 L S.S. Prin e Felizian

10 M S. Margarite

11 M S. Barnabe A.

12 J S. Onofri

13 V S. Antoni di Padue

14 S S. Eliseu

✠ 15 D S.S. Vîr, Modest e Cressenzie

16 L S. Aurelian

17 M S. Ranieri

18 M S. Marine

19 J SS. Gjervâs e Protâs

20 V S. Gjeme

21 S S. Luîs Gonzaghe

✠ 22 D S. Nicete vescul di Aquilee

23 L S. Galian

24 M S. Zuan Batiste

25 M S. Massimin

26 J S. Dolfo

27 V S. Ciril A.

28 S S. Seren

✠ 29 D SS. Pieri e Pauli

30 L S. Lucine



## TAL ORT

Raventâ verzûi, vèrzi e latuje, rati e puàrs; si lein ai ràclis  
fasûi e pomodòros; si cìmin codùmars, melòns, pomodòros;  
si gjave l'ai.

\* \* \*

*Il timp ch'al cor a san Zuan - al cor dut l'an.*

## IN CUSÌNE

*Muset da la lenga e blèdis*

Si met a boli ta la pignata, in aga frèida, il muset da la  
lenga cu li' blèdis. Quan' ch'al è cuet si tira in banda il  
muset, che si mangia cu la polenta, e tal brout si mètìn i  
risi e si fa la mignestra.

(Rizete cjolte su a Dàrzìn)

*Fasûi rus*

Si fan cuei i fasûi ta l'aghe; si tazze fine fine sivòle e savòrs  
e si met tal uèli; dopo si met dut tal brôt.

(Rizete cjolte su a Palazzûl)

## SI FÂS PAR DÎ

*« Disînle sclete (al dis un nestri amî): o la pâs cui armamenz, o la pâs dal Pape cu la benedizîon ».*

*Diu nus salvi di un'atre uere! Ma cemût la metîno cu la pâs di Khomeini, cu la pâs des ditaturis (rossis o neris)?*

*In Friûl si proteste par un poligono di tirs. Juste, sacrosante! Ma no sarajal di mandâ un bilietin a Moscje par preâju di sierâ ancje lôr i polîgonos?*

*In cambio j darin la benedizîon!*

Il Stroligât

## JUGN

*Torne dal cjamp il contadin  
strac muart di vê sgobât;  
cence fotis e cence murbìn  
e nancje timp di trai il flât.*

*Si pò ben crodi, 'e je la stagjon:  
riscjelâ fen, seselâ forment,  
'l è indafarât, 'l è un lavoròn,  
simpri di presse, mai fêr un moment.*

*La int 'e dîs: Tant lavorâ?  
puar basoâl 'l è timp piardût,  
miôr lâ al bàin, miôr lâ a balâ  
che, dopo muarz, 'l è finît dut!*

*Ma di unviâr co il cjast 'l è plen  
e in cantine cicìn e vin,  
vidiei te stale e in sotèt il fen,  
duc' olaressin fâ il contadin.*

VICO BRESSAN  
(Ròncis di Monfalcon)

## VIGJ, IL UARDIAN

Forsit mai il Comun di \*\*\* al tirá-sot, fin a chei tims, tanc' bêz in multis come quant ch' al jere uardian Vigj. No che lui lu fasés par rife, ma al ritignive di no podê mancjà al so dovê, fasint in cheste maniere ancje l'interés dal Comun.

« Chest, po, al á bisugne di tirâ bêz cun tantis robis ch' al á di proviodi: stradis, veterinari, comari, miedi, scrivanz dal Municipi... No j végnin migo jù pai cops i clanfars nancje a lui! » al pensave Vigj.

Cussì, s'al viodeve une femine passonâ cu lis pioris te Comugne o un omp a seâ erbe sun tun ôr di strade, nol lassave passâ slisse. Dal rest, lu savèvin pûr che i ceis de strade, lis gjavis a' son dal Comun!

« Esal vuestri il rivâl? ».

« Oh, nome une grampe, Vigj! Tant di dâi ai cunîns! ».

« Parcè no váiso, alore, a bati l'aste al Comun parceche al sedi vuestri par dut l'an? ».

Al tirave fûr il bloc-notes e la matite copiative. E lì, dal moment, tignint il notes su la siele de biciclete, tocjant ogni tant cul lapis la ponte de lenghe, al segnave adasi adasi cun tune scriture a vongulis date, non, cognon, e localitât. La scuse dal so lâ aplanç 'e jere par vie de pusizion, ma in realtât cun doi agn di scuele no si podeve pratindi di cori. E po, al leve ben cussì: bisugnave dâj pês al fat!

Nol coventave mai domandâ lis gjeneralitâz parceche Vigj cun tanc' agn ch' al bateve la tavie e i paîs dal Comun,

fasint ancje il cursôr, al cognosseve i nons di duc', ogni stradele, ogni rivâl, ogni cunete e parfin cui ch'a jerin i parons dai cjamps! 'O sfidi jo: quant che il perît al leve a cjapâ qualchi misure, il vuardian nol podeve mancjà!

E come ch' al veve a cûr la robe dal Comun, al veve a cûr ancje la robe di ognun. « I cjamps — al usave dî — duc' a' fâsin fature a arâju, a coltâju, a semenâju. E alore... a ognun il so! E se qualchidun al à propriit necessitât di erbe, di patatis, di blave o ce sao jo, ch' al vadi a domandâ o a fâ voris par cui ch' a 'nd'à o ch' al paj! ».

Al someave fazzil fâle francje con lui parceche si lu indivinave di lontan: la barete cul frontin ben cjalcjade sul cjâf, un biel pâ di moschetis, une gjachete nere cun tune sfilzie di batons, un pâ di bragons a la cavalerizze, gambâi e scarpons neris e, d'unviâr, une grande manteline nere intorsi. Al vignive indenant cu la biciclete nere saltuzzant pai clas e pes pozzalis su lis rauedulis di gome dure e travanant cui vôi di falcuz cisis, cjarandis, sterpis, plantis di vîz.

Ancje se no ju cjatave « in cove », come ch' al diseve lui, al jere bon di brincâju distés. S' al viodeve, metîn, vignî-fûr un di une bande là ch' a no jerin i siei cjamps, lu frontave cun tante puligane che lu faseve colâ.

« Sigheduncje, vuê 'o seis lâ a vore tal cjamp di ...? » opûr: « Cun cui si seiso metût adun par lavorâ? ».

Il Comun al veve sielt ben! Co al jere stât libar il puest di « guardia campestre », j al vevin parferît subit a lui. E lui lu cjapâ. Sui verbâi al fo scrit che al vignive metût in plante stabile par vie dai meriz di uere, ma il segretari al saveve ch' al jere un omp di fiduzie. « L'omp just al puest just! » al veve sentenziât.



Al saveve che Vigj nol podeve sopuartâ che un forest al las a paronâ in cjase di chei altris. In efiez Vigj, che ogni tant al deve une olmade ai giornâi, nol podeve dâsi pâs a savê, par esempli che l'Austrie 'e comandas ancje indulâ che veve di comandâ l'Italie: Trent e Triest a' jerin talianis! « E po Gurizze, Cormons, Gardis-cje no sono furlanis stant ch' a si cjàtin subit di là dal Judri! » al zontave.

Par chel, quant ch' e sclopâ la uere, cun dut ch'al ves dîs fîs e un so frut al fos za stât riclamât, al domandâ di lâ-sot, volontari.

Lu mandârin prin a fâ l'osservatôr sul cjampanîl de plêf di Feagne parch' al riferissi al comant, ch' al jere propri tal paîs, su l'ativitât ch'e s'indivinave cui fums e cui colps su Cjars e, daspò che il front al fo rot a Cjaurêt, sul Montel, là che une dí al viodé di lontan sbrindinâsi l'avion di chel « babio » di Francesco Baracca.

E quant ch' al savè che so fî al jere muart tune trincee e che i siei a' jerin restâz sot dai Mucs, j vignî ancjemò plui voe di parâju fûr, seben che cun dut chel ch' al veve sintût e provât si sintís scunît.

« In duc' i câs — al murmujave fra di sè, pensant ai faz de vite, ancje co al passave tal cidinôr de taviele — al è necessari ubidî 'es autoritâz, rispjetâlis, senò ce disìo no vignaressial fûr! ». E disint un tant al rivave cul pensîr ancje a sè, cumò ch' al jere un « pubblico ufficiale ».

Cussì Vigj, par stâ in linie cun ce ch' al pensave, nol podè lassâ passâ tanche un scherz il fat di vê cjatade, une sere, la sô biciclete « macolade » intant ch' al jere lât ta l'ostarie a bevi un tai di vin. Qualchidun (sigûr un par spiti-câsi di jéssi stât brincât di lui!), paransi tal scûr, j veve



puartade vie la lûs e j veve savoltâde la siele. E alore al presentâ la denunzie ai carabinieri.

No lu faseve pe lûs o pe siele, ma par la mancjanze di rispîet a lui, al vuardian! E lu scrîvè sul verbâl: « Al soto-scrito guardiano campestre hano robato il lampione dela bicicletta e hano scrovesciato la sela ». In Municipi j vevin mutivât che si podeve scrîvi « rovesciato », ma lui nol veve volût gambiâ la peraule: no si tratave di siele metude de-nant-daûr, ma disvidade e alzade cu la ponte in sù!

Nol rivâ mai a scuvierzi cui ch' al fos stât. J restâ a dilunc un grop sul stomi.

La parâ-jû nome quant che chei dal Comun j consegnarin une medae pes sôs benemerenzis di uardian, co al lê in pension.

LUZIO DI CJÂNDIT  
(Udin)



*La Madone 'e salve lis filandèris dal tet ch'al sdramasse.*  
1926 - Clauiano - Madone des Gràziis - Udin

# Luj

*Al jeve il sorèli a' oris 4,35; al tramonte a lis 19,45.*

*Ultin quart di lune il 5; lune gnove il 12; prin quart il 20; lune plene il 27.*

1	M	S. Ester	
2	M	S. Otorino	
3	J	S. Tomâs Ap.	
4	V	S. Ulderì	
5	S	S. Filomene	☾
✠	6	D S. Marie Goretti	
7	L	S. Claudio	
8	M	S. Procopi	
9	M	S. Veroniche	
10	J	S. Rufine	
11	V	S. Benedet	
12	S	SS. Ermacul Vesc. e Fortunât	☺
✠	13	D S. Indrì	
14	L	S. Roland	
15	M	S. Bonaventure	
16	M	Madone del Carmine	
17	J	S. Marine	
18	V	S. Fedrì	
19	S	S. Tecle	
✠	20	D S. Aurelio	☾
21	L	S. Denêl prof.	
22	M	S. Marie Madalene	
23	M	S. Brigjde	
24	J	S. Cristine	
25	V	S. Jacum Ap.	
26	S	S. Ane - S. Joachìn	
✠	27	D S. Celestin	☺
28	L	S. Celso	
29	M	S. Marte v.	
30	M	S. Abel	
31	J	S. Ignazi di Loyole	

## TAL ORT

Giavâ patâtis e cèvis; raventâ sèlino e puàr; in lune gnove  
semenâ spinàzis, caròtis, rucole, indìvie, blèdis, râs.

\* \* \*

*Sante Marie Madalene, - ogni ràf si semène.  
Sorèli leon, - come ch'al ciate al lasse.*

\* \* \*

*In Pofavri a' son ché bielis,  
in Frisanc 'a è la flour,  
a Ciasasola a 'nd'è una sola:  
nancja ché nissun la vuol!*

(Frisànc)

\* \* \*

## IN CUSÌNE

*Boreto graisàn*

Se mete in tel lavèsò (padièle) ogio e tre, quatro spighi de  
agio mastrussào (co 'l diventa scuro se lo cava) e co l'ogio  
xe bolente se buta drento el pesse (le qualità a seconda de  
la stagion) ben fresco co' sal e mundi (tant) pèvere. Se lo  
còvola ben e quando che el pesse xe rosolào se mete asèo.  
Se coverze co l'acqua e se lascia a bugì fin che l'acqua no  
se consumagia.

Se lo magna caldo co polenta bianca cota sul cugiàron (cial-  
dèrie).

(Rizete cjolte su a Grau)

## GNÛF LENGÂZ FURLAN

*I furlanisc', chei ch'e pitûrin lis tabêlis stradâls, chei ch'e scrivin ta' sfuèis e sfuejûz, chei ch'e pùbli-chin libruz pes scuêlis, 'e tîrin fûr peràulis furlànîs cjatàdis cui sa dulà (qualchi volte lis inventin) cussì la lôr lenghe furlane (dato po che a cjase lôr no cjacàrin mai il furlàn) 'e devente un misto di talianîsins e di peràulis che nissun capîs. No stin a fevelâ po des grafiis!*

*Cheste 'e je la vere strade par un Friûl nazion independent.*

*Il Stroligât al à un dubi: il cognon Lepre deventaràjal Gnèur?*

Il Stroligât



## « CONGRESSISC' A COIRE »

(ispirade da Kuro Mani)

*Mani - scritôr -*

*(di lenghe sguissare-ladine)*

*amî di Meni, Lelo e ancje di Dino,*

*nus compagnave atôr, une matine*

*prin dal Congrès di Coire, in Engiandine.*

*E al berghelave, in plen, te strade strete,*

*(cui sa parçe?...) cu 'n omp che si rispiète,*

*no si dîs cui, ma 'o pensi a s'induvine*

*seriôs come ch' al è: anime inquiete!*

*No dîs di plui, ma 'o sai ch' al stave in spiète,*

*fêr, impalât, devant une vetrine*

*viere di sécui, antighe: une ruvine!*

*'Ne ruvine par duc'! Aguai se chel la impète,*

*che un Congrès 'l' è un Congrès!*

*Disînle sclete: 'ne pôre maladète!...*

*Ma alore Dino, clâr, cun sô vôs nete,*

*par rompi il « cul-di-sac » di chê cunvigne,*

*al sberle fuart, a Meni, a la sô drete:*

*« Meni, al è Mani... Viôt ce ch' al cumbîne!...*

*Ma cui lu scolte?... Dio ce disdete!*

*E alore plui fuart, da rompi ogni sachete:*

*« Meni, al è Mani! Al è Mani, Meni, ch'al mene duc'*

*[te cantine!...*

\*\*\*

## MARAVEIS

Dopo cene, par bati la more o zujâ di cjartis, i amîs dal borc si cjatavin là di Gusto dal Min. Tor nûf al jentrave Pieri Norât: ordenât un miez di neri, si meteve a cjalâ la partide di briscul. Nol rivave a stâ daûr a plui di doi « raggjos » parceche biel planchin, tal clip da l' ambient, j colave il barbin sul stomi e in pôs minuz al tacave a... seâ breòns. Ogni volte la stesse musiche!

Une sere, par cjolilu vie, i quatri de briscul 'e zafàrin une grampe di tajadei 'te cusine di Gusto e, dopo veju bagnâs cul vin, ju pojàrin sul stomi di Pieri.

Pò, dismòt cun-t-une pocade, duc' intôr a vosâ:

« Cjale lì. Ce lavôrs. Sporcacjon di un om. Vergògniti! Vignî a fâ chel purcitament ancje te ostarie ».

E lui, dut sbarlufît e incocalît:

« 'Cranon. Ma quant? Cemût isal pussibil? A l'è plui di une setemane, par vie di un ris'cjalt di budiei, ch'o mangj dome uardi e blede ».

MANLIO MICHELUTTI  
(Udin)

## IL GÙE

*Cu la cjame su la schene  
al va 'l gue tôr i païs:  
al si ferme a justâ ombrenis,  
uzzâ fuarpis, mèti vîs.*

*Al sisteme la sô muele  
su la plazze, sot il tor;  
la canae 'e stâ a cjalâlu  
curiosant intôt - intôr.*

*E doman cu la sô muele  
lui al tornarà a zirâ  
da un païs a di chel âtri  
âtris fuàrpis par uzzâ.*

MJRIA FRANZ  
(Magnàn)

## DEFINIZIÛNS CURIÛSIS

Turist: un vagabònt cun bêz.

Vagabònt: un turist senze bêz.

Bêz: monéde da spindi o di mangjâ (ancje senze dinc').

Dinc': l' aparât che 'l mastèe par ingrassâ il dentist.

Dentist: l' omp ch' al mangje cui dinc' dai altris.

## CERCLI

Asêt: vin, lâ in pension.

Pension: 'ne realtât che riuârde simpri i altris.

I altris: duc', manco nô.

Nô: puârs Crisc' ch' e spiètin di lâ in pension.

\*\*\*

## STORIUTA PAR BEN DIGERÎ

Un ebreo al si presente al Signôr e j domande:

— Ce ìsal, Signôr, par vô un miliòn di àins? —

— Un minût. — rispuindé il Signôr — Apene un minût! —

— E un milion di monèdis di àur? —

E il Signôr: — Apene un carantàn! —

— Po ben, Signôr, déimi, par plasé, un carantàn!

— Spiete, benedét, un minût!... —

GUIDO DI RÒNCIS  
(Ròncis di Latisane)





*Il cont Pieri Modena e âtris di lôr 'e son salvâs de Madone  
tune burascje di mâr.*

*1795 - Madone des Grâziis - Udin*

# Avost

*Al jeve il sorèli a' oris 5,4; al tramonte a lis 19,30.  
Ultin quart di lune il 3; lune gnove il 10; prin quart il 18; lune  
plene il 26.*

	1	V	S. Alfons de' Liguori	
	2	S	S. Eusebi	
✠	3	D	S. Lidie	☾
	4	L	S. Ranieri	
	5	M	Madone de nêf - S. Svualt	
	6	M	Trasfigurazion dal Signôr	
	7	J	S. Gaetan	
	8	V	S. Erminie	
	9	S	S. Roman	☺
✠	10	D	S. Laurinz	
	11	L	S. Clare	
	12	M	S. Macari	
	13	M	S. Feliz, S. Fortunât, martars di Aquilee	
	14	J	S. Fredo	
✠	15	V	Assunzion de Beade Vergjne Marie	
	16	S	S. Rôc	
✠	17	D	S. Jacint	
	18	L	S. Eline	☾
	19	M	S. Marian	
	20	M	S. Bernart	
	21	J	S. Donât e co. martars protetôrs di Cividât	
	22	V	B. V. Regine	
	23	S	S. Rose di Lime	
✠	24	D	S. Bartolomiu Ap.	
	25	L	S. Ludui	☺
	26	M	S. Sandri	
	27	M	S. Genesio	
	28	J	S. Ustin	
	29	V	S. Sabine	
	30	S	S. Felis	
✠	31	D	S. Ristide	

## TAL ORT

Raventâ il fenòli; in cressi di lune semenâ caròtis, râs, puâr, spinàzis, salate, uàinis.

*San Lorenzo de caldura, - tant cialt e puoc al dura.  
Se fra li' dô' Madonis al ven sût, - al puarte vie dut.*

\* \* \*

*Ce ch'al tone a la marine!  
A Bertiûl no àn farine,  
chei di Virco no àn sal,  
chei di Flambri van di mâl.*

(Morteàn)

\* \* \*

## IN CUSÌNE

*Bacalà e patàtis*

Si lèssin 500 grams di bacalà e 1 chilo di patàtis. Il bacalà, netât di spinis, al va tazzât fin fin e mitût insieme a lis patàtis schizzàdis cun pôc lat, ueli, sâl, pèvar, scusse di limon gratàde, savòrs pestâz, dôs tre sedóns di farine e doi ûs. Si scialde un pôc di ueli te fersòrie e si cuei, come une torte, fin ch'e è culuride da dutis dôs lis bandis.

(Rizete cjolte su a Udin)

## CUI COMÀNDIAL?

*Il guviâr al demande es regions, lis regions 'e demàndin es provincis, lis provincis 'e demàndin ai cumùns, i cumùns 'e demàndin es comissionès, lis comissionès 'e demàndin ai sindacâs, i sindacâs 'e demàndin ai partîs, i partîs 'e demàndin al Stroligàt e jo ce àò di fâ? No isal miôr che 'o cambi mistîr? Ce disèso vô? Che 'o dedi lis dimissionès o che mi iscrivi 'e màfie?*

Il Stroligàt

## PECJÂT MORTÂL

« Vêt a mens di no bastardî  
la nestra gjernassia sparagnina,  
senò o vegnarai a tirâus pei pîs ».  
Par Ustina cjargnela  
'l è vanzêli sacrosant  
li' ultimis peraulis del pari.  
Par un fi cu l'influenta  
no coventin potôries di miedi,  
una smondeada dentrivîa  
je la man di Diu.  
Ma, né cu la cita de mîl  
né cu li' bruscjs,  
lu divulg a ubidî.  
Puera diaula  
'e je su li' bôris:  
l'omp lontan a quistâ  
e je cumo di stronfâ  
chei santesins cussî sudâs?  
E fâs in cussiensa  
clucant jù jè  
chê onza di ueli di riz.  
'L è pecjât mortâl strassâlu.

GIOVANNI MARIA BASSO  
(Orsàrie)

## CONGRESSISC' IN SGUÏSSARE

'E jere une bieie comitive: zovine, liegre e vivarose. Dome l'autist al veve 'ne neveàde de sperienze ch' a contrastave un tic cul spîrt gjeneral de rapresentanze furlane plui vere. 'Ne cjavelade blancje, a ciûf, ch' e dave tono a l' omp ingrimpât cun judizi te manubri de coriere.

Dopo al vignive « Gigi », un « grison » di Daviàn ch' al feve clape daûr, simpri par vie de cjavelade grise, cun Meni e Dino, mentri Lelo, denant, — a ciceronie-vie — al imperlave cun bielis peraulis l' itinerari sguissar, maestôs te vôs e tai vûi di duc'. Si lave a Trun...

« Ma a part chest patrimoni — al tonave Lelo — de Sguissare si racomande soledut "l'economie", une economie fuarte che si conte e si complete tai quatri cjantons: al frances, al todèsc, al taliàn e chel dai grisons ». Al polsà un moment par tirâ il flât e alore Dino — simpri lui — al disé: « Cjanton, se tu vens ca daûr 'o sarin plui fuarz anچه nô! Pense: cun te, jo, Meni e Gigi, si farès il "Cjanton dai grisons" tun moment, ca, te coriere. Ce ûstu di plui?... ».

\*\*\*



## PUBLICITÂT DI UNE VOLTE

Costantin Mariot

Al vent scarpis finis - Furnimènz di ciavài - Scóriis -  
bruschìns e altris artìcui.

\* \* \*

Zuan Valentìn

Modis - Merceriis - Cialzis - Guanz - Blanciarie par  
siôrs - Ric assortiment di ciapiei di siore.

\* \* \*

Pieri Salèt

Ciamèsis - Golèz - Damàns - Màis - Ciàlzis - Guanz -  
Pelizzis confezionàdis o in nature (naturalmentri la  
bestie 'e no è comprendude tal prèsit).

## C A M B I A M È N Z

Une volte a la massarie si dàvin mîl francs al mès. E la massarie 'è rompeve un grum di plaz, tazzis, scugjelis. Cumò la *colaboratrice familiâr* a 'n' romp di plui e par chest bisugne pajâle dusinte voltis tant. E parsore vie covente ancjmò di sigurâle, no pai plaz ch' e romp, ma parcé ch' e vebi une pensionute par quant ch' e no podarà plui ròmpindi.

## MAI STÂT A GRAU!

Perin, sglonf di sintilu profetâ, posto che nol veve viodût il mar, al dezidè di lâ cun Meni Lodar « a lumâ la grande aghe! ». Rivât daprûf la « dighe » al restà cence flât.

Meni al disè: « Cjale ce tante aghe! ».

« Nuje — al rispundè Perin — a pensâ che tu rivis a viodi dome chê parsore! ».

MANLIO MICHELUTTI

(Udin)



*Un cjaradôr, colât sot un cjâr di botis, al ringrâzie la Madone  
di vêlu salvât.*

*1851 - Madone des Grâziis - Udin*

# Setembar

*Al jeve il sorèli a' oris 5,40; al tramonte a lis 18,45.*

*Ultin quart di lune l' 1; lune gnove il 9; prin quart il 17; lune plene il 24.*

1	L	S. Egidio	☾
2	M	S. Tonin	
3	M	S. Gregori il Grant	
4	J	S. Rosalie	
5	V	S. Romol	
6	S	S. Berto	
✠ 7	D	S. Anastâs di Aquilee - S. Regine	
8	L	Nativitât di M.V.	
9	M	S. Gorgon	☺
10	M	S. Salvio	
11	J	S. Jazzint	
12	V	Non di Marie	
13	S	SS. 7 Durmienz	
✠ 14	D	Esaltazion de S. Crôs	
15	L	B. V. Marie Dolorade	
16	M	S. Cornelio	
17	M	S. Robert Bellarmin	☾
18	J	S. Sofie	
19	V	S. Genâr	
20	S	S. Fauste	
✠ 21	D	S. Mateo	
22	L	S. Maurizi	
23	M	S. Lino	
24	M	S. Pacific	☺
25	J	S. Aurelie	
26	V	S. Ciprian	
27	S	S. Remo	
✠ 28	D	S. Venceslao	
29	L	S. Michêl	
30	M	S. Jaroni	



## TAL ORT

Semenâ radric, indìvie, cevòle, ardielùt; raventâ bròcui, vèr-  
zis, cauliflòrs.

\* \* \*

*Lune setembrine, - siet lunis 'a induvine.*  
*San Micjeil, - la paussa 'a è gjuda in ceil.*

\* \* \*

## IN CUSÌNE

*Formàdi dal lûc*

Si passin li' sficjs di stipi (formadi magri di cjase) in ûf e  
pan gratât, si frizin in farsòrie e dopo parsore si met un  
frègul di nàcjes.

(Rizete cjolte su a Vilesantìne)

*Polenta cuincjada*

Si taa la polenta apena fata a tocùz picjui e si cuincja cun  
butiro, zùcar e canèla o cun butiro e formàdi vècju gratât.  
Si messeda e si mangia cjalda.

(Rizete cjolte su a Vît)

## LA « PIZZE » NAPOLETANE

*Frutàz par Udin in libare usside, in borghês, 'e inòndin lis tratorîs. Si svuèdin lis casèrmis. Si sèntin 'tôr dai taulîns a mangiâ la « pizze ». Sono mo' duc' in Friûl?*

*Contenz i ustîrs dal « cûr di Udin », contènz i farmacisc' ch'e vèndin sirînghis, contente la Patrie ben difindude (no si sa mai)!*

*Lôr 'te « pizze » 'e sîntin il « cûr di Napoli ».*

*Sperèn che in Friûl 'e vegni ancje la Fiat a plantâ un stabiliment par dâj lavôr ... ai furlàns.*

Il Stroligât

## A MARIE MADALENE

Ancje uè si è fat tart  
senze che il prinzip turchin  
al vedi tucade la tô puarte in sfese...  
Suje tai vôi lis lagrimis di sâl  
e polse un pôc l'anime tô inzulide.  
Nol zove vâi il timp  
pal so cori di presse,  
o la lune invidiâ  
pal so restâ compagne,  
o odeâ il spieli  
che ti torne lis rûis  
e l'arint sui cjavêi.  
Spalanche i vôi di sede  
e prova a lassâ in bande  
i siums da la tô voe  
ch'a rèstin bufulis  
di savon lusint  
dome fin che no tòcjin la realtât.  
Aghe fraidide no stude la tô sêt,  
Marie Madalene, tu ti jemplis di frêt  
a rumiâ ombris slambradis di dolôr.

Jessi nassûz 'e jè 'ne colpe viêre,  
e no si sa se murint la vin pajade,

*ma vivi di bessôl nol è destin:  
lu vuèlin chei ch'a van in corse mate  
cul cjâf voltât al lusum dal passât.*

*Si sa. Plui nol pò sfros di fen  
mudâsi in jarbe verde,  
ma dome sfros di fen  
mastiât cul pantan  
al pò fâsi nît di zisile di marz.  
Ogni stagjon 'e à il so biel...*

MARIO DE APOLLONIA  
(Romans di Vâr)

## TIMP DI ELEZIONI

Denant ai proverbios, si sa, ancje la filosofie plui rigoroze si lasse tentâ da un « trånseat » ocasional, ch' al dà mêrt al filosofo e al galantomp, massime se i doi si tîrin di bande e, par buinegrazie o par rasonament, 'e lassin piardi senze insisti.

Dome la lez 'e je « dura lex »! E no perdone... E no condone... E ti sbandone. Parceche la lez 'e à memorie e mai 'e dismentêe... Si à un biel dî: « Pan e gabàn » opur: « Chel che no si fàs ué, si fàs doman ». Mai fidâsi! Aguai! (« Fidâsi al è ben, ma miôr no fidâsi »). Aguai a cui ch' al cét! E no val ris'cjâ!... Miôr cjàpâle largje, a timp e cun prudenze: « Fîditi tu che mi fidarai ancje jo »: regule sante! E si dîs ben: « Par tuart o par rasòn, al é simpri mâl lâ in preson ».

Scombatût di una bande e di chê altre, Tite cumò al veve di decidi. Al jere timp di elezions e dopo il comizi, ancje lui, al si veve lassât tentâ da un « trånseat » ocasional te osterie di Cele. « Di Carneval ogni scherz al val ». Cussì, tra un got e l' altri, il discòrs dal Onorevul al jere restât di fûr la puarte par fâ strade d'implèn a filosofie furlane

dal vin e ai proverbios dai amîs. E... « Chi la dura la vince ». Dopo miezegnot Tite al veve ancjemò di rivâ a cjase. Ma a nol disperave. « Chi va piano, va sano e va... lontano » — al se diseva. — Sigur: lontano... Ma parcé « lontano? »... Nol ocôr lâ tant « lontano ». Te gnot scure za al viodeve il mur, la cjase e intant, la man te sachete, 'e strenzeve la clâf. Pàs cun pàs, senze premure al pensave propit di rivâ: il codolât, il mur — dut cuièrt di manifestc' — la cjase, ancje dute colorade: ce legrie! Ma nol cjatave la puarte... « Man, man muarte. ... Eh, no! — 'l se disé — Vive, vive!... No val la filastroche. Se mai 'e val la cioche! ». Cjatâde la rime, riduzzant, al si veve concentrât di gnûf: la cjase, il mur: i manifestc'. A 'n' tire vie un, ancjemò fresc di cole, come par câs: DC. Dopo — simpri come par câs — a 'n' tire vie un altri: PC. E al bat al mur, cu lis mans, plui fuart: « Ca 'e je la mê cjase!... ». Al grate, al sgarfe e al tire e jù un P.S.I. e dopo un altri e un altri ancjemò. Al tire, al sbrèe e al sbridine e jù un de Diéstre Nazional e chel dei Radicali e po chei dei Monarchichs. Inrabiât di no dî, al sta par tirâ-vie chel del M.S.I. cuant che 'ne vôs amighe j domande: « Scuse, Tite, ma de cual partit mai séstu?... ». « Oh, — al disé alore Tite — partît 'o soi partît! Sigûr, 'o soi stât al comizi e cumò torni. 'O torni a cjase... 'o pensavi di tornâ



a cjase. Ma cun duc' 'sti manifest' no cjati plui la puarte.  
'O sai, le àn cuviarte ».

Di colp al si revolte, le clâf in man, al cîl, a la gnot scure  
e po al sentenzie: « Oh, sastu Toni ce che ti dîs: no plui  
Democrazie, in 'stu paîs, ma sporcerie di ciarte... Tu mi  
capîs!... ».

\*\*\*



*Pieris si sdrumin dal cjâr sui frus, sot i vôi di chei ch'e  
fàsin-su un mûr.*

*1858 - Riviere di Artigne*

# Otubar

*Al jeve il sorèli a' oris 6,5; al tramonte a lis 17,50.*

*Ultin quart di lune l' 1; lune gnove il 9; prin quart il 17; lune plene il 23; ultin quart il 30.*

	1	M	S. Taresie di Jesù Babin	☾
	2	J	SS. Agnui Custodis	
	3	V	S. Gerart	
	4	S	S. Francesc di Assisi	
✠	5	D	S. Placit	
	6	L	S. Bruno	
	7	M	B. V. dal Rosari	
	8	M	S. Benedete	
	9	J	S. Abram	☺
	10	V	S. Casimir	
	11	S	S. Firmin	
✠	12	D	S. Serafin	
	13	L	S. Eduart	
	14	M	S. Calist	
	15	M	S. Taresie di Avile	
	16	J	S. Gjerart Majella	
	17	V	S. Ignazi di Antiochie	☾
	18	S	S. Luche	
✠	19	D	S. Pieri di Alcantare	
	20	L	S. Massimo	
	21	M	S. Ursule	
	22	M	S. Eraclio	
	23	J	S. Manlio	☺
	24	V	S. Enzo	
	25	S	S. Crispin	
✠	26	D	S. Evarist	
	27	L	S. Sabine	
	28	M	Simon - S. Gjude	
	29	M	S. Elio	
	30	J	B. Benvignude Boiane di Cividât	☾
	31	V	S. Volfanc	

## TAL ORT

Traplantâ: salvie, mente, melisse. Semenâ: cevòle, rås.

\* \* \*

*Sut o bagnât, - par san Luche bisugne che al sei semenât.  
A san Simon, - si giave il râf e il ravizzon.*

\* \* \*

## IN CUSÌNE

*Lièure (o ciamòð)*

A' se taia a tochið al lièure (o al ciamòð), i se lava e i se met ta 'na terìna, in composta, cun ài, savia e, se se vol, un pocia de canèla e caròfoi, par giavâi al salvare. Daspua a' se met aga e asèi o vin. Du' quant la sera par l'indoman.

Doe, tre ore prima de mangiâ a' se giava e a' se sugia la ciârñ ta 'na canevàða, begn e pulì, a' se met ta 'na tecia vuole e butiro, un fià da ðeola e una ponta de ai che daspua a' se giava, e a' se rosolèa la ciârñ. Quan' ch'a l'è begn rosolada a' se met un got de vin, bianc o negre, da lassâlo consumâ. Allora a' se donta l'aga, un fià a la volta, par no cuòilo les. In ultema, se te vuol sguadâ matant, te lo lassa cul tocio de prima, o se no te donta un got de vin bianc. Par chi ch'a j pias, a seconda del bocato, a' se può fiè chesta salsa: pestâ al figià cun ai, savia, pressèmol, una presina de ðùcher, limon e un guciarìn de asèi. Rosolâ e daspua mete un fià de vin da fiè vaporâ. La se met parsora al lièure (o al ciamòð) un fià prima de servìlo.

(Rizete cjolte su a Claut)

## CONTADÌNS

*Cumò ju clàmin « coltivatôrs direz » dulà che « direz » al vorès dî che còltin, che arin e che regòlin lôr la tiare par vivi. Ma il biel al è che quasi duc' i « coltivatôrs dirèz » 'e fàsin coltâ e arâ la tiare dai « imprenditôrs agrìcui », ma ancje chei 'e son coltivatôrs direz. Risultât? Blave, nome blave, simpri blave!*

*Ma in Italie no si mangje polente, si mangje pan e il pan al ven da l'estero.*

*Il Stroligàt al è patriòtic e... al mangje polente.*

Il Stroligàt



## « G E L M I »

A Voleson « Gelmi » duc' lu cognossevin: un mataràn. Si podeviâl pensâ un Carnevâl senze di lui, in mascare? O un prin di Coresînte, cu le renghe sul cjapièl e 'ne code sbrendolade di fûr dai bleòns, in zîr pai paîs: a San Lurinz, Darzin, San Martin, Ciasteòns e Sòpule, infin a Pordenon? O la Domenie Ulive, cun fassinis d'ulîf, dal sigûr benedet par chê so gran passion dai bêz? E po' di Pasche, cui ûs colorîs cui fonz dal café e cul vêrt di urtie, bulide tal sgia-vìn? E di Nadâl? E il Prin da l' an? Simpri il prin a fâ i augurios di pâs e di bondanze: « Bun di, bon an, dâimi 'ne buine man!... ». Squasi a di, senze dilu: « Iudâimi! E che il Signôr us dedi dal ben par chest an e l' an cu ven!... ». Ma ancje la sere dai Muarz, co si tratave di sunâ li' ciampanis... pai vîs, che po a' puartavin di chel bon di bevi e di puartâ a cjase, s'a 'n' vanzave. Paraltri, duc' a' savevin ch' al si dâve di fâ lânt a vøre, co 'l podeve, da cui ch'a lu clamave: dai Pagnucs o dai Gri, dai Perûz o i Bertoja di San Lurinz. Ma Gelmi no 'l veve simpri di bisugne parceche al si inze-gnave ancje di fachin, in stazion. « Facchino, signore! — al sberlave; e sotvôs, dut jentri: di man e di fûr! — Signore, facchino!... Facchino!... ». Le vôs, clare, si tasêve tal piazzâl dome quant che il treno j veve depositât almanco quatri valis, da partâ dongje, in presse. Cussì a Voleson, a Pordenon (par qualchi timp) e a Udin. Cu le « mance » al lâve a gustâ e al pajave. Ma co no 'l veve bêz, né altre sostanze, al man-giave a puf. Dopo, magari, al saldave, se al podeve, cuant

ch' al tornave. A Pordenon là di « Coràn » no 'l jere plui tornât. Il puf, come un claut te memorie smamide, al si jere intorteât. Ma Gelmi no 'l si visave. Cussì a Udin, te tratorie « Al Cjavedal », il cont 'l aumentave. Un puf di trente mil, al si diseve Gelmi, no 'l è po tant. Si mangje e po si pâje. Tant il camerîr lu cognosseve. L' ultime volte, però, lu veve visât: il paron di gnove gestion no 'l feve credit. Si scugnive pajâ. Gelmi, alore, al si veve impuntât tant che il claut te memorie al si jere fat plui rûzin. D' altre bande Voleson lu tentave. Miôr restâ culi. Ce gust! Ce ajâr san, odôr di nasebon, e di ledàn tal stali... In chê domenie il treno al veve cinc minuz di ritârt. Un nuje, pal treno. Come i trente mil de puf « Al Cjavedal ». Ma cui si visave?... La int no s'interesse ai pinsîrs di Gelmi. Trente mil: un nuje. Un fiscjo, lontan; la curve: il treno! « Facchino, signore... Facchino... » (di man e di fûr). Cinc personis ch' e mòntin: doi « totolòs » di Dursinîns, la fie di Nene e doi zovenàs di San Martin. Devant di lui, dome un al dismonte: un siôr. Dal sigûr un siôr, alt, magri, grîs, distint; senze valis. « Scusi, facchino, — a Gelmi no j par vere: tono precis, de persone di mont ch' e sa ce ch' e ûl —. Cerco una persona »... « Dica, signore, — al si veve butât Gelmi — se posso. Io conosco tutti ». « Ecco, vede — al veve dite il siôr cun buine misure — cerco un certo Gelmi... se lo conoscesse... ». « Ma sicuro, signore, come no? Gelmi Salvador; venga, l' accompagno io... ». E lu veve partât tal piazzal di Voleson, senze di altri. Al jere squasi misdî e l' ajâr al cjantave cul sun dal cjampanon e il profun di bruàde e di polèz al fôr. « Abita lontano? » — al disé il siôr, cjapât da un scrùpul —. « No tant, daûr de tratorie: "Alla scala". In due minuti ci siamo.

Eco, ve' là. Se al crôt, di ciôi qualchi cjosse, siôr... Ch' al jentri!... Tunine: — al clamà — doi puesc'! » e al si sente. « Ch' e puarti di mangiâ, Tunine. 'O vin premure... Chel ch' al è ». Cussì, senze dî alc 'e màngjn. Fàsui, bruàde cul musèt, un tic di polèz, patatis e radìc: 'ne buine mangjade. Po' il café cu le sgnape e un sigarèt. « Eco, — al disé alore, Gelmi — se al spiete un moment vai in zercje di Gelmi e j lu presenti. Ch' al spieti, un moment. Vai e torni!... ». Il siôr lu veve viodùt lâ-vie senze suspièt, pròpit cun fiducje. Ma cumò, la int di Voleson 'e è sigure che il siôr al è ancjemò ch' al spiete che Gelmi al torni a pajâ il cont de tratorie « Alla Scala » e i trente mil a gnove gestjon al « Cja-vedâl » di Udin.

\*\*\*

## PROCESSION IN ANDREIS

*Al é un lustre  
pí lustre  
adés che 'l sorele  
al sbrissa  
lontan  
ta fois de oru veciu.*

*Su par la strada de Andreis  
'na femina 'a ciamina  
cu' li' scarpis in man.*

*I suna li' ciampànis  
par la procession  
e li' bandierùtis  
intôr del ciampanile  
i trima  
ta un ciél  
sempre pí scûr de ploia...*

ROSANNA PARONI BERTOJA  
(Montréal)

## FÈMINIS IN OTOMÒBIL

Dô' machinis 'e si ùrtin. La zòvine ch'e guide la « cinc-cent » 'e salte fûr imburide: — No puèdial stâ plui atent quan' ch'al va in zîr? — 'e sberle furiose. — Il so al è il secont otomòbil che ài urtât ué! —





*Il tulugn dal àrghin j bat tal cjâf al operari dal macèl.  
Madone des Gràziis - Udin*

# Novembar

*Al jeve il sorèli a' oris 6,45; al tramonte a lis 16,55.*

*Lune gnove il 7; prin quart il 15; lune plene il 22; ultin quart il 29.*

✠	1	S	Duc' i Sanz	
✠	2	D	Duc' i Muarz	
	3	L	S. Silvie	
	4	M	S. Carli Boromeo	
	5	M	SS. Martars Aquileiês	
	6	J	S. Lenart	
	7	V	S. Ernest	☺
	8	S	S. Gofredo	
✠	9	D	S. Oreste	
	10	L	S. Leon il Grant	
	11	M	S. Martin di Tours	
	12	M	S. Cristian	
	13	J	S. Diego	
	14	V	S. Venerande	
	15	S	S. Poldo	☾
✠	16	D	S. Gjeltrude	
	17	L	S. Lisabete	
	18	M	S. Fredian	
	19	M	S. Fausto	
	20	J	S. Feliz	
	21	V	Madone de Salût	
	22	S	S. Cecilie	☺
✠	23	D	Crist Re	
	24	L	S. Firmine	
	25	M	S. Catarine, S. Crisogono Vesc. e martar di Aquilèe	
	26	M	S. Lenart	
	27	J	S. Valerian Vesc. e martar di Aquilèe	
	28	V	S. Mansuet	☾
	29	S	S. Saturnin	
✠	30	D	I di Avent	

## TAL ORT

Semenâ cesaròns, caròtis; plantâ ài; dâ su la tiare a sèlino.  
indivie, ardicìocs.

*A san Clemènt, - si finìs di meti la siale e il forment.  
Fin santa Caterina, - la verza 'a ciamina.*

\* \* \*

*I fantàs di Vil di Sora  
a' i pratìnt di jessi bieì,  
a' i àn tosàda la codòpa  
a usàncja dai purcجي.  
I fantas di Vil di Sot  
a' i pratìnt di jessi granc',  
sot un bar da la sô vis'cja  
a' i stan sot duc' quanc'.*

(Tramònz)

\* \* \*

## IN CUSÌNE

*Talpin di pursit in tociu*

Si fa a tocs il talpìn, ben netât, e si met ta 'na tècia, ch'a  
se implinìs di aga cialda; si met pèveri, sal, canèla, osmarìn,  
ai e savòla. Si lassa bulì par dô' orìs e mieza, tre e si mangia  
cu la polenta.

(Rizete cjolte su a Lignàn)

## BALÒN

*Lis societâs di balòn 'e àn otignût dal guviâr un âtri prestit o mutuo di dusinte miliarz parvie che jenfri cinc àins no podaràn vendi i zuiadôrs. 'O larìn a finîle che ancje il balon, come il teatro, il cine ecc. al sarà mantignût dal guviâr.*

*No saressial miôr, par finîle, che lis societâs invezì di clamâsi Milan, Rome, Udinese si clamassin daurman « Edera », « Stella Rossa », « Rosa Mistica » ecc.?*

Il Stroligât

## LA CIASA DI PRENSIPO

*Ah, Barel, si ti saves!  
Tal borc di Scjavès  
la ruspa  
cun quatri sdrondenons  
'a à rebaltât  
murs e barcons  
e zint denant e 'davour  
'a ti spacava  
il ciâf cun chel rumour.  
Àn splanât chê ciasuta  
di Maria Prensipa.  
Tant strussiât,  
duta la vita,  
tant lambicât  
par fa chei quatri murs.  
Zent ingorda:  
veis di fâ ciasons;  
uh!  
guaja jodi il clap,  
il len rût!  
Fasarèis barcons vers  
di plastica.  
Malandrés,  
vierzéit i cours*

*sun chês ciasutis.  
No movi nencia un clap  
parsé  
ogni clap,  
ogni scaja à inenfra  
un pucia di anima  
di chê puora beada.*

OVIDIO COLUSSI  
(Ciasarse)



## DEZ DI UNE VOLTE E DI UÉ

Si pesave il savê tai timp passâz,  
vué stature, bardele e pîs cialzâs.

\* \* \*

Da pî grande montagne al ûf di ruie,  
nuje in chist mont nol è creât par nuje.

\* \* \*

Chel che in prisinze tô al dîs mâl di me,  
oh, ce tantis che a mi 'l mi 'n' dîs di te!

\* \* \*

Scartât il timp durmît e mâl spindût,  
se tu às cent ains a 'nd'àstu tros vivût?

\* \* \*

Pai voi ti entre la passion tal câr  
e pal rot de sachete 'e ti va fûr.

\* \* \*

Miôr li' barghèssis rotis te fadìe,  
che lustràdis sul cul in ostarìe.

\* \* \*

Se mai nissun no ti à spudât aduès,  
par te brut segno: no s'invidie il mus.

\* \* \*

Par fâ furtune l'inzen al è une mane,  
ma, prin di dut, bisugne vê furtune.

\* \* \*

## VECJ' LI' STRADI'

*Vecj' li' stradi'  
là ch'a' s'ingrùmin  
tormi' e pas di ombri'.  
Vecju al é il timp,  
ch'a còrin i miârs  
a pas di sperì'.  
No vecju il cour.  
Ponta di lûs,  
al fora la cjar stracada  
e al ten il soreli.*

NOVELLA CANTARUTTI  
(Spilimbèrc)



*Une mari 'e domande la grazie pal so frut colât te cjaldèrie.  
Madone des Gràziis - Udin*

# Dicembar

*Al jeve il sorèli a' oris 7,35; al tramonte a lis 16,35.*

*Lune gnove il 7; prin quart il 15; lune plene il 21; ultin quart il 29.*

	1	L	E. Eligio Vesc.	
	2	M	S. Cromazi Vescul di Aquilee	
	3	M	S. Francesc Saveri	
	4	J	S. Barbare	
	5	V	S. Crispine	
	6	S	S. Nicole	
✠	7	D	II di Avent	☾
✠	8	L	Imacolade Concezion de B. V. Marie	
	9	M	S. Siro	
	10	M	S. Melchiade - Madone di Laurèt	
	11	J	S. Damàs	
	12	V	S. Dionis	
	13	S	S. Lussie	
✠	14	D	III di Avent	
	15	L	S. Achile	☾
	16	M	S. Delaide	
	17	M	S. Lazar	
	18	J	S. Grazian	
	19	V	S. Anastàs	
	20	S	S. Zefirin	
✠	21	D	IV di Avent	☾
	22	L	S. Flavian	
	23	M	S. Vitòrie	
	24	M	S. Dele	
✠	25	J	Nadàl di nestri Signôr Jesus Crist	
✠	26	V	S. Stiefin	
	27	S	S. Zuan Ap.	
✠	28	D	I Sanz Inocenz	
	29	L	S. Martinian	☾
	30	M	S. Gjenio	
	31	M	S. Silvestri	



## TAL ORT

*L'ort al polse*

\* \* \*

*San Nicolò, san Nicolèt,  
se mê mare no l' me n' met,  
se mê pare no 'l me n' dà,  
san Nicolò 'l è bel passà.*

(Sacil)

## IN CUSÌNE

*Boaràcs*

In chista stagion na son da purgâ. Dopo ben lavâdas si met t'un tin di aga salâda a bòli par liberâju da la scussa. A' si fâs un sofrît cun uòli, ài e un puòcia di sivòla e si las met a rosolâ cun tun pugn di farina di flôr e un pugn di pressèmbal pestât. Dopo si met lat e si missida parsé se no a' tèntin a tacâ. Si lassa cuoi fin ch'al ven un biel tociùt fis.

(Rizete cjolte su a For di 'Sora)

*Strùcul*

Si fâs la pasta di farîna di flôr, ûs, sùcar, ont e una presa di sâl. Si tira fina e si met il riplèn di pangratât frit tal ont, canèla, scussa di limon, pignùi e milùs gratàs.

Si rodóla e si schissa da li' dô' bândis, si met su la lama onzuda del for e si lassa cuei una mieza oruta.

(Rizete cjolte su a Luzzinins)

## FRIÛL ETNIC

*Stant su la lune 'o ài vidût in Friûl: siciliâns, calabrês, puliês, istriâns, slovens, altoatesîns, militârs, gîgios, zîngars ecc. Vino di podê fâ un censimènt? Un predi mi disève: « Baste che si furlanîzin e son i benvignûs ».*

*'O sarai un stroligât, ma... vino di furlanizâ ancje i furlans?*

Il Stroligât

## LA LETERUTA

*Gnò caro e bon Gesù,  
dibot al è Nadâl  
e, come ducj i ains,  
Ti scrîf par un regâl.*

*Lu sai,  
no soi stât bon  
e propio pal gno fat  
meritarès cjarvòn,*

*ma ormai mi soi pentît,  
no conti pì busîes,  
i' ài fat già cinc fiorètos,  
i' ài dit le' Ave Marîes.*

*L'è pront encja il presepio;  
bessôl i' mi lu ài fat  
cui claps da la Miduna  
e i bussulòs dal lat.*

*Il pin  
a nol mi è stât:  
Tu sâs, al è un pûc pìciul  
il gno prefabricât.*

*Ma ades i' voi preâti  
di una ruba sôl:  
no sta mandâ disgrâcies,  
slontàna ogni dolôr,*

*no fâ vaî la zent  
ch'a à pierdût dut quant,  
ma dai tant coràgiu  
par zî sempri indavânt*

*e iùdila, lu à dit il nonu,  
a sparagnâ ogni mês,  
parcé che a fâ la cjasà  
a' vol un grum di bês!*

SALVINO SIGALOTTI  
(Sequels)

## AL FRIUL

Tal riùl ch' al cjante  
in viarte d' amôr  
si spegle un cîl ch' al sarà nestri,  
frut.

\*\*\*

## COMIÂT

*Cumò l' Amî dal « Strolic » e dal « Ce fastu?... »  
ch' al à capît da tant ce ch' a lu spiete,  
fasint i auguri « Salt » a cui s' inquiete  
l' invida i ciârs Amîs — 'e son 'ne clape —  
a fâ une vive sclete al « Sot la nape »...  
Poben: je fate!*

**VIVE!**

\*\*\*

\* \* \*

*Saveso quale che je la grazie che 'o ài domandade  
al Signôr? Chê di jessi lassât in pâs almancul dopo  
muart!*

Il Stroligàt



## RINGRAZIAMENT

La presse e la preocupaziòn (di un bon acèt al « Strolìc » par l' otante) no fàsin impediment a cui ch' al sint di ringraziâ cui merte:

« Il Strolégat » (Luigi Ciceri) e i colaboradôrs  
Giannino Angeli - Giovanni Maria Basso - Giorgio Bordini - Vico Bressan - Alan Brusini - Novella Cantarutti - Riccardo Castellani - Ovidio Colussi - Guido Cudin - Mario De Apollonia - Luzio di Cjàndit (Lucio Peressi) - Maria Forte - Mjria Franz - Guido Michelutti - Manlio Michelutti - Rosanna Paroni-Bertoja - Alberto Picotti - Sergio Rebuson - Lucia Scoziero - Salvino Sigalotti - Aldo Tomé - Riccardo Viola.

Contis e puisîis senza firme 'e son dal Diretôr responsàbil.

Finît di stampâ là da la G.E.A.P.  
a Pordenon

sot Sante Caterine  
dal 1979

RENATO APPI  
*diretôr responsabil*

*Spedizione in abb. postale - IV gruppo*



# **gubana** **DORBOLO'**

S. PIETRO AL NATISONE (UD) ITALY



**IL DOLCE TIPICO  
DELLE VALLI  
DEL NATISONE**

DITTA E. DORBOLO' E F.LLI S.N.C.  
S. PIETRO AL NATISONE (UD) ITALY  
TEL. 727052

# FOTO CINE PIGNAT

UDINE - Via Rauscedo, 1/C - Tel. (0432) 22.729

IL PIU' VASTO ASSORTIMENTO FOTOGRAFICO DI COSTUMI,  
PAESAGGI E OPERE D'ARTE DEL FRIULI

# CASA DELL'ORAFO

Via Rialto, 9 - 33100 UDINE - Telefono (0432) 205845



di FACILE  
GIUSEPPE  
MATERIALE ELETTRICO  
LAMPADARI  
ARTICOLI REGALO

BOUTIQUE DELL'ARREDAMENTO VIA MANIN 10 TEL. (0432) 22415  
33100 UDINE.

SEDE: VIALE VOLONTARI DELLA LIBERTA' 56 TEL. (0432) 41923

**Macchine per cucire  
originali svizzere**

# elna

Rappresentante esclusivo per il Friuli-Venezia Giulia

*Ditta De Puppi Gemolotto*

33100 UDINE Via Mercatovecchio, 37 Telefono (0432) 22936

**Operazione finanziamento famiglie**

# FAMIGLIA

Una famiglia, una vera famiglia, è una cosa meravigliosa. Ma una famiglia, oggi, ha anche tanti problemi pratici da risolvere, e che vuole risolvere, proprio perchè «vera», e quindi concreta. Un certo avvenire, una certa sicurezza sono cose fondamentali: cose molto più rapidamente realizzabili, se ... potesse disporre subito di «quella certa cifra»! Per questo, convinta che

proprio i nuclei familiari siano i più capaci produttori di risparmio, la Cassa di Risparmio di Udine e Pordenone, ha pensato all'«**Operazione Finanziamento Famiglie**», che viene così a completare le precedenti iniziative già dirette alle famiglie medesime, quali la concessione di mutui agevolati per l'edilizia privata, i «prestiti sull'onore» a studenti universitari etc.

L'«**Operazione Finanziamento Famiglie**», sulla quale il personale di ogni nostra filiale sarà lieto di dare a tutti le più ampie informazioni, rappresenta una iniziativa, che la Cassa di Risparmio di Udine e Pordenone, ha inteso realizzare nella convinzione che la famiglia debba essere solidarietà, costruttività e costante impegno comune per la risoluzione dei più assillanti problemi economici.

**Cassa di Risparmio di Udine e Pordenone**



**fondata nel 1876**



# cav. Ferro Fiori eredi

LEGNAMI - MATERIALI EDILI  
ARTICOLI IGIENICO-SANITARI ED IDRAULICI  
ELETTRODOMESTICI

P.le Udine - Tel. (0432) 760126 - 33050 MORTEGLIANO (UD)



## ANZIUTTI

macchine per ufficio

Via F. Mantica, 34 - 33100 UDINE - Tel. (0432) 291775

MACCHINE PER SCRIVERE - CALCOLATRICI ELETTRONICHE  
FOTOCOPIATRICI - MACCHINE AFFRANCATRICI

# Banco di Tricesimo

*Il risparmio si apprezza  
il giorno del bisogno*

V. ELLERO & C. - Tel. (0432) 851130

## CROATTO

gioiellerie

### LONGINES

cronometraggio ufficiale alle olimpiadi  
MOSCA 80

via mercatovecchio 11 - via delle erbe 7 - udine





## **SOCIETA' MACCHINE UTENSILI TECNICI**

Casa fondata nel 1901

**Sede a:** 20123 MILANO - Via Ansperto, 9 - Telefono 874281

**Filiali a:** 33100 UDINE - Viale XXIII Marzo, 34 -

Tel. 206056 - 208129 - 22253 - 22131

33100 TREVISO - Via Martiri d. Libertà, 30 - Tel. 49266

34170 GORIZIA - Piazza della Vittoria, 50 - Tel. 2975





ORA SIAMO  
**IL GIOCATTOLO 2**

SEMPRE A **UDINE**

IN VIA MERCATOVECCHIO MA AL N. 29

Oreficeria artigiana

**GREMESE**

**Oreficeria - Argenteria - Orologeria**

VIA RIALTO, 17 - 3100 **UDINE** - TELEFONO (0432) 205416

**LUCIANA** **MAGLIERIA**

*Uomo - Donna*

VIA CARDUCCI, 50 - 33100 **UDINE** - TEL. (0432) 205946

**OROLOGERIA - GIOILLERIA**

**MONSUTTICOPPE**

33100 **UDINE** - Piazzale Chiavris - Telefono (0432) 470977

# JRILA

**COMMISSIONARIA S.p.A.**

Via Gaeta, 2 - 33100 UDINE - Tel. (0432) 292651

---

## **VENDITA LATERIZI**

---

# DE ROSA

*Ascensori*

*Montacarichi*

*Montavivande*

**Costruzioni - Riparazioni e manutenzioni**

UDINE - Via Sabbadini, 66 - Tel. (0432) 22678



ASSORTIMENTO DI OGNI TIPO CORNICI E ARTICOLI BELLE ARTI

IDRAULICA

**AUGUSTO  
GECELE**

FORNITURE IDRAULICHE  
TECNICHE INDUSTRIALI

per acqua - aria - gas  
gasolio - vapore

33100 UDINE - Viale Ungheria, 55 - Tel. (0432) 22007 203736

***Birra Moretti Stazione***

*Tavola calda - Ristorante - Pizzeria*

UDINE - Viale Europa Unità, 69 (di fronte alla stazione F.S.)  
Telefono (0432) 293897



ARTICOLI SPORTIVI

**DIANA sport**

33100 UDINE - Viale Volontari della Libertà, 46  
(Chiavris) - Telefono (0432) 42850





*Porcellane - Mobili in stile  
Posaterie - Argenterie  
Articoli casalinghi  
Cristallerie*

PIAZZA MATTEOTTI, 10 - UDINE - TELEFONO (0432) 22358

**CUTTINI gioiellieri**

*di Giorgio e Claudio s.n.c.*

33100 UDINE

Via P. Canciani, 6/a

Telef. (0432) 207016



# CALZOLERIA S. GIACOMO

*D. RIZZI*

Piazza Matteotti, 1  
Telefono (0432) 23940  
**33100 UDINE**

Burro e formaggi

***Finati & Petrin***

Via E. Valvason, 1 - Telefono (0432) 23113 - 33100 UDINE

SPECIALITA' ESTERE E NAZIONALI  
REGGIANI - PARMIGIANI - FRIULANI

## ANGELO LINDA

UDINE  
1919 - 1979

SESSANT'ANNI DI SPECIALIZZAZIONE NEI SETTORI  
DELL'ABBIGLIAMENTO, MERCERIE, FILATI, PROFUMERIE.

Ingrosso: via G. Muratti, 13 - dettaglio: via P. Canciani, 6

## ANTICA BOTTEGA ARTIGIANA

FONDATA NEL 1877

PREMIATA OROLOGERIA OREFICERIA

33100 UDINE - Via Rialto, 12-a - Tel. 208709

**A. ROSA**

Laboratorio riparazioni orologi - Concessionario ufficiale di vendita  
degli orologi ERNEST BOREL

ASSISTENZA TECNICA PER OGNI OCCORRENZA

**libreria  
Rinascita**

**LIBRI  
GIOCHI  
EDUCATIVI  
DISCHI  
RIVISTE  
GRAFICA**

**udine 33100  
via gemona 52a  
tel. 0432/291868**

**CONCERIE**  
**Cogolo**  
**S.P.A.**



**33100 ZUGLIANO (UD) ITALY  
C.P. 295 - 33100 UDINE  
TEL. (0432) 31131 (7 LINEE) UDINE  
TELEX 450150 COBOR-I  
TELEGRAMMI COBOR UDINE  
CODICE FISCALE N. 00163500309**

# Officine Fratelli Bertoli Spa

fu Rodolfo

Capitale sociale L. 3.500.000.000

ACCIAIERIA  
FONDERIA ACCIAIO E GHISA  
LAMINATOIO  
FORGIATURA E STAMPAGGIO  
OFFICINE MECCANICHE  
CARPENTERIE METALLICHE

33100 UDINE - Via Molin Nuovo, 39  
Telef. (0432) 470241-2-3 - Telex 450151

## Dovete fare acquisti in cartoleria?

*Noi abbiamo quasi tutto e  
spesso anche molte cose in più*

(per esempio una sala di esposizione  
con almeno 3.000 idee regalo)

## CARTOLERIA

# BENEDETTI

33100 UDINE

Via Mercatovecchio, 13  
Telefono (0432) 22534



# Banca Popolare di Cividale

Società Cooperativa a r.l. - Fondata nel 1886 - Cod. Az. 5484

Iscritta al N. 22 Reg. Società del Tribunale di Udine - CCIAA N. 12523

**SEDE: 33043 CIVIDALE DEL FRIULI - Corso Mazzini, 6**

Direzione: Tel. 71290

Uffici: Tel. 70370 - 70374 - 71060

Telex: 450185 CIBANK

## **FILIALI:**

<b>33040 ATTIMIS</b> - Via di Mezzo, 15	Tel. 789014
<b>33042 BUTTRIO</b> - Via Stazione, 3	Tel. 674001
<b>33044 MANZANO</b> - Via Divisione Julia, 5	Tel. 74733
<b>33047 REMANZACCO</b> - Piazza P. Diacono, 14	Tel. 667076
<b>33048 SAN GIOVANNI AL NATISONE</b> - Via L. da Vinci, 7	Tel. 756024
<b>33040 SAN LEONARDO</b> - Via Scrutto, 54	Tel. 72218
<b>33049 SAN PIETRO AL NATISONE</b> - Via Roma, 129	Tel. 727046

**Crediti speciali per l'agricoltura, media e piccola industria, artigianato e commercio, industria alberghiera e turismo**

**Servizi di Cassa continua e Cassette di sicurezza presso la Sede Centrale, la sede di S. Giovanni al Natisone e la Sede di Manzano**

**Banca agente per il Commercio con l'estero con uffici dislocati presso:**

**la Sede di Cividale in Cividale**

**la Filiale di Manzano in Manzano**

# LAURA

*Confezioni - Filati - Maglierie*

VIA MANZONI, 13 - TELEFONO (0432) 71229  
33043 CIVIDALE DEL FRIULI



## Fratelli PICCOLI

*Ferramenta - Casalinghi - Utensileria*

33043 CIVIDALE DEL FRIULI  
Corso Mazzini, 13 - Telefono (0432) 71018



## Gianni Rossi

diffusion moda

Corso Mazzini - Tel. (0432) 71856  
33043 CIVIDALE DEL FRIULI

## Marino Palma

*Abbigliamento e Confezioni*

33043 CIVIDALE DEL FRIULI  
Piazza A. Picco - Telefono (0432) 71275



tradizione  
fiducia  
progresso

non è soltanto  
uno slogan  
ma il nostro modo  
di essere  
e di operare



**BANCA del FRIULI**

ISTITUTO INTERREGIONALE DI CREDITO

## **Profumeria DINELLI**

**Forniture per parrucchieri barbieri estetiste**

33100 UDINE - VIA DEL GELSO, 25 - TEL. (0432) 206675  
VIALE DUODO, 45 - TEL. (0432) 22422

---

Ingresso e minuto

---

## **F.lli ROMANELLI LEGNAMI - s.a.s.**

Cinquant'anni di esperienza nel campo delle resinose

33100 UDINE - Via Milazzo 14 - ☎ 207851-2

☎ Romalegno

**ETTENDORF Lav. (Austria)**

Produzione propria



# SOLER EMILIO S.n.c.

DI E. & FIGLI

TESSUTI - CONFEZIONI - ARREDAMENTI

CONCESSIONARIO DI ZONA  
**SNAIDERO - MOBIAN**

33097 SPILIMBERGO (PN)  
Corso Roma 35 - Tel. (0427) 2025  
Via Udine 3 - Tel. (0427) 3919



## GRAPPA D'ORO

PRODUCT



OF ITALY

### ACQUAVITE FRIULANA

PRODOTTO E IMBOTTIGLIATO DALLA  
DISTILLERIA GRAPPA D'ORO F.lli SERENA - SPILIMBERGO - FRIULI  
L.I.C. U.T.I. F. N. 20 - UD. CONT. CC. 750 - GR. 42

*Antica distilleria  
a tipo artigiano  
che lavora solo  
le vinacce dei  
piccoli produttori  
della zona*

*Produzione  
limitata ma scelta*

**DISTILLERIA  
F.lli SERENA**

**SPILIMBERGO  
(Pordenone)**

**Libreria  
Friuli  
UDINE**  
Largo dei Pecile, 7  
tel. 21102

**LIBRI  
DI OGNI TIPO  
E CATEGORIA**

**TESTI  
SCOLASTICI  
E  
UNIVERSITARI**

---

**VIDUSSI**

---

**TESSUTI**

**CONFEZIONI**

**ARREDAMENTI**

---

**VIDUSSI**

---

**33043 CIVIDALE DEL FRIULI - PIAZZA A. PICCO  
TELEFONO (0432) 70051 - 70052**

# **A.C.E.R.**

**S.a.s.**

**A. Mesaglio**

VINI  
LIQUORI  
ESTERI E NAZIONALI  
DOLCIUMI  
CONFEZIONI REGALO

LA BOUTIQUE  
DELLE BOTTIGLIE

Da sempre tradizione  
e qualità

33100 UDINE - Via Manin, 16 - Telefono (0432) 206186

# **ing. A. MAGINI**

33100 UDINE - Via Prefettura, 8  
Telefono (0432) 293980

---

## **Pozzi profondi - Pompe sommerse**

---

**IMPIANTI**

**ELETTRICI - TERMICI - IDRAULICI**

per

ville - condomini - stabilimenti - acquedotti



# Banca Popolare di Gemona

Capitae Sociale e Riserve L. 2.344.867.218

**SEDE IN GEMONA DEL FRIULI (UD)**  
PIAZZA GARIBALDI, 9

**TELEFONI:**

97251 (5 linee) CENTRALINO

97296 DIRETTORE

**TELEX:** 450161 GEMOBK

Indirizzo telegrafico: BANCA POPOLARE GEMONA

**AGENZIA DI CITTA':** PIOVEGA, Tel. 980290

**AGENZIE:** ARTEGNA Tel. 987017

BUIA » 96141

MAJANO » 959021

TRASAGHIS » 984024

VENZONE » 985020

OSOPPO (prossima apertura)

**ESATTORIE:**

Gemona - Artegnà - Bordano - Buia - Montenars - Osoppo -  
Trasaghis - Venzone.

**TESORERIE:**

Di 8 Comuni e di vari enti morali

**BANCA AGENTE PER IL COMMERCIO DEI CAMBI**  
**SERVIZIO DI CASSA CONTINUA**

CASSETTE DI SICUREZZA PRESSO LA SEDE DI GEMONA  
LE FILIALI DI MAJANO E TRASAGHIS

# Banca Popolare di Latisana

Società Cooperativa a responsabilità limitata

## SEDE E DIREZIONE CENTRALE

33053 LATISANA (UD) PIAZZA INDIPENDENZA - Tel. 50784

## FILIALI

33054 LIGNANO SABBIADORO	Tel. 71267
33054 LIGNANO PINETA (Stagionale)	Tel. 72200
33455 MUZZANA DEL TURGNANO	Tel. 69008
33056 PALAZZOLO DELLO STELLA	Tel. 58005
33050 RONCHIS	Tel. 56016

Corrispondente delle maggiori banche italiane

**Tutte le operazioni di banca**

Credito Agrario, Artigiano, Edilizio

CAMBIO - WECHSEL - CHANGE

# Canciani

di E. VITTORI & FIGLIO S.a.s.

**LIQUORI - DISTILLATI**

**La Grappa « La Furlana del Collio »**

**SPECIALITA' LIQUORI DI FRUTTA**

34170 GORIZIA - VIA CORSICA 5

Tel. (0481) 2228



# **Furlans**

a Vignesie us spiete la

## ***Tratorie de Colombe***

San Marco, 1665 - Telefono (041) 23817 - 21175

## **e l' *Albergo Bonvechiati***

San Marco, 4488 - Telefono (041) 85017

Telex 410560 BONVEL

---

di GIOVANNI DEANA paron furlan

---

Pubblicità a cura di: **AFA PUBBLICITA'**

Via del Carbone, 1 - 33100 UDINE - Telefono (0432) 22324



essential to establish a

fundamental principle of

the system of education

of the people of Colombia

Albergo Bonvecchioli  
1774-1775

the first of the series

of the series of the

